

СЕРГЕЙ МОРОЗОВ



ТУЛЫС  
ВОСЬЛАЛІС  
ВОДЗЁ

820

*J. M. ...*

СЕРГЕЙ МОРОЗОВ

**ТУЛЫС  
ВОСЬЛАЛІС  
ВОДЗӦ**

ВИСЬТЪЯС  
ДА ОЧЕРКЪЯС

Коми книжнӧй издательство  
Сыктывкар 1973

С (Комп)  
М 80

М  $\frac{0732-004}{M128(03)-73}$  28-73 м



Висътъяс

ТЭБУК КЕРӨС

I

**В**ойвивса пармалөн өти кыпид да гажа пельёс, кодлөн нэмөвөйся нимыс Тэбук,— шувгё и шувгё. Шувгё оз пыр өтмоза: кор гораа, а кодыр и муртса кывмөн, но нэм чөжыс шувгё-сьылө асьыс помасьлытөм сьыланкывсө. Тайө сьылөм-шувгёмсө чужтөны и вой төв, и лун төв, и асыв, и рытив төвъяс. Тайө шувгём-сьылөмыскөд сорласьө-йитчө тшөтш и мулысь озырлун корсьысьяслөн уджалан горыс, кодъ-

яс лун и вой зільоны пыдоджык и пыдоджык пискодчыны сэтчө, көні дзедзьомон нэмсө олө-вылө кизьөр сьод зарни. Войвывса нефть талун трубасод визувтө нин страна шөрө. А сійос корсьом мунө водзө и водзө.

Шувгө Тэбук, кодi озыр гум кодь шыльыд да веськыд пожомьясон, мича ягьясон, тулысын бузгысь шорьясон, лапкорья тыясон, уна полос зверь-поткаон.

Мед жө шувгө Тэбук керос — гажа яг! Сылон шувгөм-увгөмысь экспедицияса йоз кылөны да водзө кутасны кывны шог да кыпыд сьылөм и кольөм, и öнiя, и водзө кад йылысь.

Геологоразведочной бурение контораса директор Василий Семёнович Царёв пукалис аслас кабинетын. Кадыс квайт час, а сiйö эз лосьодчы мунны. Окога вöли пукалыштны öтнасөнлы, думайтыштны öтитормөдтор йылысь. Но сылы тайос вöчны бара на эз удайтчы — кылис öдзөсö таркнитөм.

— Да,— шуис Царёв юрсö кыпөдлытөг.

— Позьö, директор ёрт?— порог вомон воськовтис морт да сувтис öдзөс дорө.

— А-а! Важся тодса! Прөйдитөй,— индiс кинас Царёв пызан водзын сулалысь креслө вылө.— Кутшөм могон, Шомысов ёрт? Бара нин выль бригадаö вöзысян?..

— Василий Семёнович, да öд...

— Тырмас!— ордiс Царёв.— Миянлы колөны оз гастролерьяс, а буровикьяс. Гөгөрвоин? Аски мунан Муравьевлөн бригадаö. Гараж дорысь аддзан кык мортос. Налон овьясыс — Туисова да Липин. Сэтчө жө мунөны. Ставыс, Шомысов ёрт! И төд,— ме тэныд көсья сөмын бурөс.

Царёв эз кут висьтавны Шомысовлы, позтөм көк кодь летунлы, мый Муравьёвлөн бригадалы, коді өні помалө 18-өд номера бурөвөй вылын уджъяс, сетөма нин приказ вуджны ещө пыдө тайгаө, көні лоө Тэбукын медся джуджыд бурөвөй.

Май помлань Тэбук ягъясын кутисны пөльтны шоныд төвъяс. Найө воисны кысянькө лунвывсянь да рывыв-лунвывсянь, воисны и пырысь-пыр ловзьөдісны войвывлысь көдзыдъясөн дыр кежлө топөдлөм ывла вывсө.

Шондөдіс кызкө друг — өти войө. Рывнас на көдзыда да гажтөма шывгисны енэжті руд кос кымөръяс, йөжгылясисны ыркыдысла сөмын на потөм коръяса бадьяс да Тэбук ю кыр йылын чушкөдчөм пырейяс, а вой шөр бөрын став ывлаыс быттьө кокниа лолыштис, кыскис ас пытшкас сук шоныд сынөдсө, а сэсся и пондіс вежны чужөмбансө.

Тэбук юлөн джуджыд кыркөтшын, нейджыд кушинын, дөввидзисны вит балок да кузькодь барак. Шор вомөн вөчөма перилөяса пода пос, коді йитө тайө посёлоксө вөр весьтө кыпөдчөм бурөвөй вышкакөд. Тайө — Тэбук пармалөн медся ылі пельөсыс.

Сёр рывт, но баракын оз на узыны. Стендорса крөватъын, вылыс дөрөм-гачсө пөрччытөг, гатшөн куйлө Шомысов. Пуктөма кияссө балябөж улас да, пөтөлөкас видзөдіг, ачыс аскөдыс сёрнитө:

— Директор шуис — медбөръяысь пө... Аслам чужан муын уджтө оз көсйыны сетны. А көні вөвлі, быдлаын на уджыд ачыс вөзйысьліс.

— Көнъясын нө тэ, Лёша, вөлін? — юалис бурильщиклөн отсасьысь Федя Филоненко.

— Көні вөлі — сэні өні абу нин, — серөктис Шомы-

сов, кодї неважон воис Муравьёв бригадао. Вөлөмкө, Филоненко да Шомысов война дырйи восьлалөмаось Сталинградсянь Кенигсбергөдз өти мотомеханизированной бригадын. Шомысов — миномётчикон, Филоненко — пэтээровецон.

Баракө тэрмасигтыр пырө төждысьысь чужөма, нейджыд тушаа, арлыда нин морт — бурөвөй мастер Степан Николаевич Муравьёв.

— Шомысов, Филоненко, Кызьюров, — пыригмоз шыөдчис Муравьёв аслас уджалысьяс динө. — Көмасьөй, пасьтасьөй да өнi жө вышка динө сөй раствор вөчны!

— Мый нин бара лои? Ми жө сөмын на смена вылысь, мудзось, — шуис Филоненко.

— Бурөвөй вылын авария. Йөзөс ме кыпөда тревога серти.

— Авария? — дженьыдика шуис Кызьюров да кутис көмасьны-пасьтасьны.

— Кодi вөчис, мед сийө и бырөдас, — веськодьпырысь шуис Шомысов койка вывсьыс чеччывтөг.

Кызьюровлөн пасьтассис да сийө, кыв ни джын шутөг, петис комнатаысь. Филоненко бөрө-водзө шөйтис джодж кузя, видис Муравьёвөс, а Шомысов, буракө, дөзмис сийөс кывзынысө да чеччис кровать вывсьыс.

— Ветла кухняө... Гашкө, чай стөканөн гөститөдасны... — и петис комнатаысь.

## II

Кузь кокьяса көрт вышка дорын жуысь йөз пыр содис и содис. Муравьёв корис отсөг вылө вахта бөрын став прөстмөмяссө. Степан Николаевич

думсьыс видіс Давыдовос, кодлөн сменаын лои аварияыс. Некодлы, весиг мастерлы, эз вөв гөгөрвоана, кытчө му пытшкын вошө сөй раствор. Кор бригада заводитіс пьськөдны скважина, ставыс вөлі лючки-ладнө. Бурөвөй снаряд век пыдөджык пырис му пытшкө. Но со, сөй растворыс, кодөс качайтисны скважинаө, эз кут кыпөдны долотоон перйөм пөрөдасө му веркөсө.

Мастер сувтөдіс унджык йөзөс раствор дасьтөм вылө. Но мыйта көть эз качайтны, сійө кытчөкө пыр вошис и вошис забояс.

Муравьев котраліс өтарө-мөдарө, сійө вөлі повзьөма, мый сөйыс сэтшөм өдйө чинө — өд вайны сійөс зэв сьөкыд: первой автомашинаясөн, а нюр во мөн тракторьяс кыскөны.

— Тыш муніс нин час, мөдөс, коймөдөс... Йөз мездисны. Давыдов сменалөн вахта помасис, но войтырыс эз жө мунны гортаныс. Муравьев сөмын верхөвөйлы тшөктіс вежсьыны, лэччыны уліө, но Володя Липин кольччис ас местаас. Выль сменаын воис и Шомысов, кайліс аслас уджалан местаөдз, но Володя эз вешйы пост вывсьыс, тшөктіс Шомысовлы отсасьны улиас.

— Мый нө, бөр мунны баракө?— Шомысов шыөдчис аслас старшөй бурильщик Иванов дорө сідзи, мед тшөтш кыліс Муравьев да гөгөрвоис: Шомысов пө удж вылас петөма ас кадө.

Но мастер скөрысь шыасис:

— Мун, эн гартчы кок улын!

А Шомысов бытьө тайө кывьяссө и виччысис: бөр мөдөдчис общежитиеө. Ас кежас медмисьтөм кывьясөн мастерөс, а өти сайын и том верхөвөй Володя Липинөс, өриг-пинялігтыр сійө бөр воис баракө. Сэні Филоненко век на вөлі пасьтасьө.

— Эн тэрмась,— өлөдiс другсö Шомысов.— Сэни миянтöг тырмö йöзыс.

Давыдов сменаысь йöз воисны сöмын асьядорыс. Асьядорыс сöмын вермисны дöмны скважинаын лоом розьсö, кытi петiс и петiс ортсö кизьöр сей. Йöз музысла öдвa сулалiсны кок йылын, сейöн мавтчöмысла вöлины дзик рудöсь. Кык друг, Шомысов да Филоненко, спокойнöя узисны.

Сы пыдди найö аскинас эз вöвны лөньюсь. Торйөннин сэк, кор мастер шуис налы:

— Премия списокö ме эг суй тiянöс.

Тайö лөня шуом кывьясыс пырысь-пыр жö быттьö йöймöдiсны Филоненкоöс.

— Абу тэнад сэтшöм правоыс!— горöдiс сийö.— Ми пыр на тыртiм норма!

— Куш норма тыртöмыд этша на, колö тшöтш и мортөн лоны,— шуис Муравьев.

Филоненко төкөттьö оз пот дурмöмысла, видчö, кокъяснас зымöдö. Шум вылö воисны и кодсюрö орча комнатаысь. А Муравьев пуксис пызан дорö да лөня ещö öтчид шуис:

— Премия тiянлы оз ло.

Андрей Васильевич Ивановлөн сменаыс уджалiс луннас. Мастер Муравьевлысь бурöвöй вылö воомсö медводз вышка вивсяныыс казялiс Шомысов. «Баранин ваткыльтö-воö»,— аслыс шуис сийö.

Шомысов оз радейт мастерöс. Оз сы вöсна, мый быдлаö суйö нырсö и нинöмтор оз коль казьявтöг. Весиг оз сыысь, мый вöйдөррыт на видiс да критикуйтiс сийöс, Шомысовöс.

Шомысов медсясö оз радейт мастерöс сы вöсна, мый быд раз пример пыдди, кодлысь колö велöдчыны уджавны, вайöдö Липинöс. Тайö жö позор! Бригадаыс ставнас кутас серавны: сюра тошка мужик пö детинкалысь велöдчö.. «Некор оз ло тайö. Ог туй — вöтлы! А ме ог омöля уджав. Сменасаяс ме вылö оз элясьны»,— вышка вылын сулалигөн мөвпалис Шомысов, а ачыс синъяснас кыйöдис мастер бöрся, кодi пыралис дизелистьяс динö, кочегаръяс ордö, а сэсся воис улысса площадка вылö.

Ивановлөн смена заводитис уджсö колонна лэдзёмсянь. Тэрыб кокни вöраса помбур чачаён моз вöдитчис кык пудъя ключён. Муфтасö зэлöдöм бöрын сийö лэдзис колоннасö скважинаö, шыбитлис блоклысь круксö Шомысовлы.

Шомысов эз эшты юрсö гыжйыштны скважинаö трубаяс лэдзигөн. Та вöсна сийö весиг эз казав Муравьевлысь сы дорö кыпöдчöмсö. Верхөвöй дрөгнитис, кор мышсьыс кылис гөлöс:

— Но, кызди делöясыд, космонавт! Тадзи, буракö, другъясыд тэнö нимтöны?

Шомысов бугжыльён видзöдлис мастер вылö, буркнитис:

— Эн мешайтчö... Аддзанныд, лолыштны некор...

— Да, тысяча пудъя труба суйны му пытшкö — абу кокни,— быттö мастер кöсйис йитчыны Шомысовлөн сёрникöд, а сэсся содтис:— Тэ верман бура уджавны, кор кöсьян. Та вылö тэнад эм сям и сусьлун, да и туша-рожанад бать-мамьд абу öбидитöмны. Сöмын меным öтитор абу гөгөрвоана, мыйла тэ ыръянитысь уж кодь... Век стенö каян?

— Эн, мися, мешайтчы! Аддзанныд — лолыштны некор!— пöшти горöдис Шомысов, и сэк жö уддорсянь сынöдсö юковтис пель чунöдана шутөвтöм, кодi

венліс бурөвөй вылысь быд пөлөс шумсө. Тодса сигнал! Короны сетны виль свеча. Шомысов видзөдліс лэччысь мастер вылө: тэ пө мыжаыс тайө шутөвтөм-сьыс, кысьясян-ветлан кор оз ков, мешайтчан... Но мастерлөн ошкөмыс век жө йиджис сьөлөмас.

### III

Исаак Эйхер — бригадаын пыдди пуктана морт. Сійө витөд во нин бурильщикалө, но разведкаын заводитис уджавны рабочөйсян.

Коді сійө да кызди веськаліс ылі войвылө?

Исаак — вөвлөм фронтөвик. Филоненко да Шомысов кө ошйысьөмөн лыддьоны асьнысө танкистьясөн, көть эськө и танк вылас найө эз пуксьывны война чөж, Эйхер помөдз вөлі пехотаын. Быдторсө жө лои аддзывны мортыдлы: кыкысь ранитчыліс, куйліс госпитальясын, но ранаяс вылө медся сьөкыд рана сылөн лои война помасьөм бөрын. Эйхер куйліс госпитальын Архангельскын. Ъістіс письмө рөдинаас — Украинаө, көні вөліны бать-мамыс да ичөтджык чоя-вокаыс. Воча кывйыс муртса эз ви сійөс. Гижисны бокөвөй йөз: фашистьяс пө сиктысь лыйлісны став еврейяссө, кодъяс эз удитны дзевсьыны либө пышйыны... Госпитальысь петөм бөрын Эйхерөс эз нин сэсся кыскы чужанінас.

Исааккөд госпитальын куйлісны тшөтш и комиса вөвлөм нефть перйысьяс. Найө уна висьтавлісны сылы войвывса озыр му йылысь, сы йылысь, мый сэтчө колөны уна сюсь йөз. И вөвлөм фронтовик лои мупытшса озырлун корсьысьөн.

Исаак уна скважина писькөдіс Вой-Вожын, Нижнөй Омраын да Джеболын. Но сылөн, кызди и уна

мукöд разведчикъяслөн, сьөлöмыс медъёна бурмис Тэбук пармаын, кытысь лои аддзöма, позьö шуны, нефтьлысь быдса море.

А водзын виччысисны выль тöдтöминъяс, разведчикъясöс виччысисны ыліджык ягъяс да нюръяс.

Удж, книгаяс, газетъяс, радио — со мыйöн тыр вöлі Исааклөн олöмыс.

Неважөнсянь Эйхер заводитіс нуöдавны аслас йöзкöд политинформацияс, сійö кужöмөн висътавліс страналөн олөм да рубежсайса событияс йылысь. Тайöс вöчны сылы тшöктіс Аня Туисова, кодöс тöлысь сайын бөрйисны профгруппоргö. Гожöмын, отпускъяс дырйи, Исаак ветлывліс лунвылö, кытысь быд пöрйö вöлі виччысьöны не öтнассö... Но татшöм чайтöмъясыс воысь воö эз збыльмывлыны.

...Исаак Эйхерлөн смена куйліс-туплясис бурөвöйкöд орчча эжа вылын. Вахта вылö сувттöдз ещö дас вит минут, позьö на нюжмасъыштны, шмонитыштны öта-мöд вылын.

— Видзöд, видзöд, Алёша! Горшсö косялö-сьылö морыд! — юрнас довкнитöмөн индіс Филоненко вышка йывлань, көні верхөвöй Володя Липин и збыль паськөдлывліс вомсö, көть эськө моторъяслөн шум вöсна немтор эз кыв.

— Выліад сулалігөн и меным окота овлывлö сьывны, — вочавидзис Шомысов, кодöс мастер неважөн вуджөдіс Иванов бригадаысь Эйхер бригадаö. Буракö, Эйхер отсөгөн мастер көсйö öдйөнджык перевоспитайтны наян мортöс...

А Шомысов недыр мысти философ моз көрталіс асьыс мөвпсö:

— Кымын вылынджык му веркөссиянь мортыд, сымын кыпыдджык лолыслы.

— Алёш, кызд тэ чайтан, эм тані газ либё нефть?— водзё сёрнитё Федя.

— Одвакё...

— А мем кажитчё эм! Вот сэки и пируйтыштам! Сэки премиятё мянлы быть сет...

— Дасьты деньга мешоктё,— пиньяс пырыс сё-дзёдыштіс Шомысов.— Муравьёвыд тэа-меалы бара на кутшөмкё пыкөд аддзас.

— А меным уна оз и ков,— шыасис тшөтш том рабочёй.— Телевизор вылө кө тырмас и.

— Некутшөм телевизор оз ков!— шмонитіс нин Шомысов.— Лок кавшасям мекөд вышка вылө — ылөдз тыдалө.

Сьёкыд брезент паськөма рабочёйяс сералігтыр-йи мөдөдчисны бурөвөйланы. Кокьяс уланыс юждөм топыд му, өти-мөдлаын куйлісны штабельясө тэчөм буритчан трубаяс.

Исаак Эйхер муртса кольчыштіс ёртъяссыс да кутіс думайтны пансьөм сёрни йывсьыс. Сылы кызд-кө эз вөв лөсьыд. Көть таөдзса скважинасө лои писькөдөма срокысь водз, но век жө нефть сэні эз вөв. Бригадалы эськө и сетісны премия, но мыйлакө чайтсис, мый босьтісны государстволысь дарөвөй деньга.

Бурөвөй вылын пельястө чунөдө дизельяслөн да насосьяслөн шумыс. Давыдовлөн смена сөмын на помаліс инструмент кыпөдөм. Сэні жө мастер Муравьёв.

Эйхерлөн смена ассъыс уджсө заводитіс колонна лэдзөмсянь. Федя Филоненко — удж вылын тэрыб да сюсь — тупкис турбинасө, шутөвтис да горөдіс верхөвөй Шомысовлы:

— Эй тэ, космонавт! Лэдз нөшта өти свеча!

Быд сменаын тадзи: мыйөн сөмың Шомысов көть

здук кежлө манитчыштас аслас люлькаын,—пырысь-пыр жө улісянь кылас Филоненколысь пель чунөдана шутөвтөм, коді венө став машинаяслысь өтувья шумсө. Первойсө, кор Шомысов воис на бригадаө, ташөм шутьлялөмыс зэв частө кывлывліс, сы вөсна мый Алексейлы, сьөкыдкодь вөраса мортлы, эз вөв өна кокни верхөвөявны Федя Филоненкокөд, коді уджалігас кажитчис биа сьөлөмаөн да инструментьяснас вөдитчис чачаөн моз. Но вочасөн Шомысов велаліс, соловей-рөзбойниклөн шутьлялөмыс шочмис.

Филоненко лэдзис пневматика, и ключ ньөжжйө матыстчис свеча дорө, топөдіс сійөс аслас вына чельюстьясөн да кутіс винтитны.

Ещө өти кызь вит метр кузьта свеча мөдөдчис мулөн гыркө. А кымын татшөмыс! Не өти дас!

— Ёна жө төлка тайө ключыс!— шуис нимкодьямөм Филоненко отсасьысьыслы.—Бытьө чорыд кабырөн кватитө свечасө, өти здукө винтитө сійөс. Первойсө меным эз и веритсьы, мый ставсө тайөс вөчө машина, а оз морт ки.

#### IV

Вахта вылын сулалысь бурильщик Ивановлы кажитчис, мый талун сійөс виччысьө удача. Сійө эз төд, мыйла тадзсө кажитчис, но сьөлөмыс висьталіс буретш та йылысь. И друг отсасьысьыс горөдіс вөвлытөм кыпыдлунөн да радлунөн:

— Андрей Васильевич!

— Мый лой?—скөрысь шуис Иванов, көть эськө аслас сьөлөмыс долыда ёкмуніс.

Помбур индіс сылы пыдіысь перйөм-кыпөдөм порода вылө, а ачыс паськыда нюмьялө. «Мый тайө? Абу-ө нефть?!—вирдыштіс юрас Ивановлөн.—А мый!

Скважиналөн джудждаыс матысмö нин планөвöйö... И менам сменаын! Ура!» Андрей Васильевич уськөдчис, кватитіс помбур кыыс породасö, маос моз вайөдіс ныр дорас. Исалис, исалис... Брызшьыбитіс да кватитіс кыкнан кинас скважинаысь петысь выль порода чукөр. Бара исалис... Сэссия тай кызди горөдас мый вынсьыс:

— Нефть! Тані эм нефть! Ми аддзим!

Бурөвöй вылын мукөдъяс эз на казавны бурильщиклысь да помбурлысь радлөмысла весьөпөрөмсö. Моторьяс уджалісны нормальнөя, век пыдөджык и пыдөджык рөвнөя пырис ротор.

— Эй, Иван!— горөдіс Андрей Васильевич том рабочöйлы.— Мед öти кокыд вöлі тані, а мөдыд— сэні! Котөрт Муравьев дорө да öні жö кор сійөс бурөвöй вылө. Гөгөрвоин? Дуй!— и йөткыштіс том мортөс ас дінсьыс да сідзи, мый мөдыс муртса эз сунгысь ныр вылас.

А Иванов бара на кутіс видлавны-исавны порода-сö, сэтысь кыліс газ дук, уджөдөм сөй растворын төдчисны нефтьлөн выя чутьяс. Да, тайö нефть!

«Менам сменаын! Менам сменаын воим сьөд зарниөдз!..»— шөпкис ас кежас Иванов. Мөд пөлөс мөвпяс öні сылөн юрас эз вөвны, дай налы эз вөв сэні весиг ичөтик пельөстор. Сійө ас гөгөрсьыс нинөм эз аддзы, эз кыв... Эз кыв и вына дизельяслысь мургөмсö. Эз аддзы гажа асывсö, веж паськөма сөстөм пармасö.

Вылісянь кыліс көрт трубаö клөнгөм шы— тайö верхөвöй сетіс сигнал: мастер пö воö. Иванов да помбурыс өтпырйө чатөртісны юрьяснысö вывлань да пыр жö гөгөрвоисны верхөвöйөс. Тадзисö и водзті вөчлывліс сійө Иванов тшөктөм серти, медем начальство эз су найөс виччысьтөг.

Андрей Васильевич эз нин вермы терпитнысö. Сылы окота вöлі, мед нефть фонтан öні жö брызнитас. И сійö котöртис аслас лебёдка дорысь дизельнойö да тшöктис содтыны инструментлысь оборотсö сэтчöдз, кытчöдз поэяна.

— Нефтьыс тыдалö нин забойын!— моторьяс шум пырыс радпырысь горöдис дизелистлы.— Пычкы моторьясыдлысь ставсö!

Муравьёв, пöсялöма, кишкиг-кашкигтыр тупыльтчис бурöвöй вылö да веськыда Иванов дорö.

— Но мый, мый лои? Висьтав öдйö!..— горöдис воигмозыс.

Бурильщик воча нюмъялис сылы, сэсся босьтис мастерöс сой пöлöдыс да вайöдис скважина дорö, мыччис сöмын на перйöм порода. Муравьёв — опытной морт — кутис исавны, видлавны скважина пыдöсысь, кык сюрс метр пыднаысь кыпöдöм порода, уджöдöм сёй раствор... Мый тайö? Нефтьлөн көрыс. Шлам. Газлөн дук и.

— Эй, Иван!— корис Муравьёв ас дорас сійö жö том рабочöйсö, кодi вöлі ноксьö кочегарка дорын, но мöдыс, буракö, эз кыв чукöстöмсö.

— Иван!

— Иван!— öтпырйö горöдисны и бурильщик и помбур да кинас и кокнас корисны ас дораныс. Мöдыс котөрөн воис.

— Со мый, Иван!— шуис сылы Муравьёв.— Тэныд, другö, нöшта на ковмас котралыштны. Öні жö нельöд скоростьöн төвзы Володя Липин дорö да сет сылы со тайö гижöдторсö.

Муравьёв кыскис пытшкöс морöс зепсыс блокнотсö да тэрмасьöмөн гижыштіс сэтчö кыв-мöд, сэсся нетшыштіс листсö да сетис посыльнойлы. Володя Липинлы мастер тшöктис йитчыны рация пыр конто-

рако́д да ю́ртны «59» но́мера бурёвöй вылын нефтьлөн признакъяс петкөдчөм йылысь.

— Анна Степановна!— Степан Николаевич шыөдчис старшöй кочегар Туисова дорö, кодi сöмын на матыстчис на динö. Сийö эз и зиль дзевны ассыс волнуйтчөмсö.— Мед тiян том нывкаясыд оз ылавны кытчөкö. Мун кочегаркаад, сюся видзөдöй приборъяс бöрся. Матысмö, буракö, сийö здукыс, кодi мянлы сэтшöма колö.

И сэки налысь — Муравьёвлысь да Туисовалысь — пельяссö чунöдiс горөдöм.

— Товарищ мастер! Моторъяслы сетöма «зелёной улича»— найö пычкöны ставсö, мый вермöны!— быттьö армияын салдат рапортуйтiс съод чужöма да мазутось кияса дизелист. Сылөн еджыд пиньясыс жерьялысны восьса вомас. Туисова весиг шпыньмуни́с сы вылö видзөдлөм бöрын, но тайöс дизелист эз казав, сийö, кызди и быдөн, вöли шызьöма бур юөрөн. Да и кодi нö оз кут радлыны татшөмторыдлы! Öд быдөнöс нин шогөдлiс сыысь, мый бөръя скважинаысь нефтьыс налы эз сюр. Куш удждоныд тай оз на дзикөдз бурмөд мортыдлысь ловтö.

Но Муравьёв виччысьтөг стрöга пальöдыштiс дизелистöс:

— Тэ мый, йöймин! Кыдз тэ лысьтан сiдзи рискуйтны? Мун öнi жö чинты оборотъяссö... Мун!

Дизелист гөгөрвотөг лапйөдлыштiс синьяснас, сэсся уськөдчис котöртны дизельнöйлань.

А сэк костi посёлок шызис нин ставнас.

— Нефть! Нефть сюрöма!— то öтилаын, то мөдлаын кылысны горөдöмъяс. Унаөн уськөдчисны котöртны бурёвöйлань.

Володя Липин юөртiс виль победа йылысь контораö.

Но буретш сэки бурөвöй вылын быттьö джöмдiсны, мисьтöма ружöктiсны дизельяс, йöймис дриллометрлөн стрелкаыс — кутiс зэв тэрыба чепсасыны öтарö-мöдарö. А öд дриллометр — бурөвöй вылын механической страж, видзö быд пöлöс виччысьтöм-торъясысь. Сэсся ёна уси скважинаö качайтан сёй растворлөн давлениеыс.

Степан Николаевич, мыйöн казялис ставсö тайöс, лёкысь горöдiс, мед öнi жö чинтасны моторъяслысь оборотъяссö. Сийö весиг йöткыштiс ас местасыс Ивановлысь помбурсö да ачыс кутчысис «АКБ-3» ключö. Но вöли нин сёр...

Кык сюрс метр пыднаын, кор бурыс вот-вот нин воодчас забой пыдöсö, лои авария.

Бара заводитчис аврал. Дорвыв нель час чöж Муравьёвлөн бурөвикъясыс тильсисны-мырсисны, медым перйыны скважинаысь трубаяслысь сьöкыд колонна-сö. А кор скважина вомын тыдовтчис медбөръя свечаыс, Степан Николаевич мурчнитiс пиньяснас да, шуйга кисö сьöлөм бердас топöдöмөн, ойöстiс — бурлөн турбинаыс да роторыс кольöмны забойö... Ноко лэпты, судзöд найöс сэтысь!

— Степан Николаевич, видзöдлы! — горöдiс Иванов да кинас индiс вывлань, енэжö. Муравьёв чатöртчылис да пыр жö бөр копыртчис. Сылы быттьö сьöлөм улас пуртөн сутшкисны. «Пöрысь выжыв, тэрмаси!» — сöмын и удитiс мөвпыштны ас кежас. А вышка весьтын жургысь вертолёт ньöжйö да веськыда моз лэччис увлань, сэсся и небыда пуксис кос веретя вылö. Вертолётысь петiсны йöз: öти, мөд, коймөд, нельöд, витöд...

Бурөвöй вылö воисны гöстьяс: бурение контораса директор Царёв да мукöд.

— Степан Николаевич! Пöся чолёмалам тэнö да

бригадатё ставнас виль успехон!— мастер дорё матыстчём бёрын топөдліс сылысь кисё контораса директор, а сэсса сідз жё вёчисны мукөд воысьяс. Муравьёвлөн вомсьяс воча кыв ни джын эз пет. Сійө видзөдіс кок улас.

— Мый нө тэ, Степан Николаевич? Мудзин, узьтөм?— падмыштіс Царёв. Но сэки кодкө юөртис сылы лоём авария йылысь.

Муравьёв кывзіс жё да чөв оліс. Сійө көсйис сөмын өтитор, медым өдйөджык мунісны бурөвөй вылысь өні сэтшөма ковтөм гөстьяс да позис заводитны кыпөдны кольөм инструментсө. Удайтчас-ө? Тайө мөвпясыс сөмын и вөліны өні мастер юрын.

И директорлы окота лои бур кывйөн такөдышты ёна шогсьяс мастерөс. Царёв важысянь нин төдіс Муравьёвөс, кызд ыджыд сьөлөма мортөс, коді сетіс уна, зэв уна вын разведкалы.

Воысьяс недыр сулалөм мысти мөдөдчисны вертолётлань. Лои гажтөм.

— Степан Николаевич, авария ыджыд, серьёзной,— Муравьёвкөд орччөн восьлалігөн шуис директор.— Но ме таысь ог весьөпөр. Ме эска тэныд, помөдз эска тэнад йөзлы.

Недыр мысти вертолёт бөр кыпөдчис веськыда места вывсянныс да веськөдчис лунвывлань. Контораса директор сідзи и эз аддзыв нефтьсө. Морттө лои ылөдлөма.

Дас куим сутки чөж дугдывтөг йөз зілісны бырөдны авариясө. Лэдзлісны забойө выльысь-виль приспособлениеяс, төждысисны, не этшаысь волісны зыкө... Дас коймөд лун помас вөлісь Исаак Эйхер друг кутіс кывны, мый забойө мынлөм турбинаөс

лои крукыштöма. Бур юөр öти здукөн кывсис бурöвöй пасьтала. Скважиналөн вом дорö чукöртчис вахтаыс ставнас. Пондiсны кыпöдны трубаяс. Кутшöм виччысьöмөн вöчисны тайö уджсö! Код төдас, гашкö, турбинаыс öдва-öдва кутчысьö да: лишнöй ёнджыка тракнитан, и выльысь лэбыштас му пытшкас. Но, шудыд вылö, татшöмтор эз ло.

Дырөн-регыдөн ставсö лои вайöдöма ас местаö,— бурение мунö нин выльысь. Выльысь ловзис забой. Коли кык сутки авария бырöдöмсянь. Вахта вылын бара жö сулалiс Эйхерлөн бригадаыс. И мый жö?

...Кыдзкö нем виччысьтöг чöv ланьтiсны вына дизельяс. Бурöвöй вылö чукöртчöм йöз быттö эз жö сетны лов шы. Чöv оліс и скважина.

Степан Николаевич дөрöм сосьяснас чышкаліс чужöм кузяыс шорөн визувтысь ньылöмсö. Сетас скважина нефть али оз? Збыль öмöй и тайö, код вылö опытнöй разведчик кутö сэтшöм ыджыд надея,— лоас ялавичөн? Мыйта төждысьöм, мырсьöм...

Со көнкö пыдын, му пытшкас, кутiс муракывны, чушйöдлыны. Сэсса скважиналөн көрт горшысь петис гораа ышловзьöм. И сійö жö здукас йöзлысь пельяссö чунöдiс шутөвтöм. Скважинаыс дрöгнитiс, быттö быдөнлөн кок улас муыс кутiс лайкьявны-вөрны: и сійö жö здукас ыджыд вынөн чепöсйис пыдысь му пытшкысь нефтьлөн сьöd фонтан.

Бурöвöйöс кытшалысь йöз друг быттö ловзисны. Налөн гораа горзöмьясыс кутiсны юргыны паськыд пармаын. Сынöдö качисны кепкаяс, йöз кутлісны öтамöднысьö, горзiсны, окасисны.

Степан Николаевич котөрөн лэччис вышка выльысь, уськөдчис пидзöс вылас. Со сійö — сьöd зарниыс — сылөн ки пыдöс вылын: пöсь на, нырад чамгö

аслас дукөн. Степан Николаевич копыртчис, кыскис нырнас кизьөр съод зарнились чорыд көрсө.

— Ок и пыдын тэ, съод зарни!— сөмын и шуис сійө морөс тырнас лолыштөмөн.

И ставөн исалисны съод вуйсө, мыссисны сійөн, мавтисны өта-мөдсө. Вөліны шудаось, кыпидось, радось — кизьөр съод зарни корсьысьяс! Шуда вөлі и йөзсьыс неуна бокин сулалысь да нюмъялысь Исаак Эйхер. Сөмын сійө, войнаөн бурдлытөма доймөм морт, эз вермы сідзи восьсөн, асьсө куттөг, ышмыны, кызди тайос вөчисны мукөдъяс, томъяс, кызди ышмөны бригадаса весиг асныра, съөкыд йөз: Шомысов да Филоненко. Исаак Эйхер нюмъялөмөн видзөдіс и пидзөсьяс вылас пыр на сулалысь мастер Муравьев вылө, кодлөн нефтьось чужөм вылын негрлөн моз сярвидзисны гырысь пиньясыс, зэв ёна төдчисны син еджыдъясыс. Эйхер видзөдіс асьыс ышмөм ёртьяс-сө, пидзөсчаньясьөм мастерос да виччысис: регыд Муравьев чеччас, веськыда сувтас, сэсся матыстчылас нефтьөн шувгысь бурөвөй дорын радлысь быд морт дінө, кутлас быдөнөс топыда, весиг асныра нефть корсьысьясөс — Шомысовос да Филоненкоос. Та бөрын костөдчыштас йөзсьыс, сувтас паськыда, пуктас кияссө кос кусыньясас да, кызди и Эйхер, мөдас видзөдны нефтьөн зэрысь бурөвөй вылө да сэнi ышмысь, гажөдчысь ёртьясыс вылө, кодъяс кутасны радлыны, нимкодьясны, шуавны өта-мөдыслы медся мелі кывьяссө талун сэтчөдз, кытчөдз оз усьмөн мудзны ас киөн шедөдөм праздниксьыс.

## МИЯНЛЫ КОЛЁ ВОВ

**Б**елоруссияын нин, Полоцк кар босьтём бёрын, миянлысь мотомеханизированной бригаданы-мөс, коді вөлі пырө первой танкөвой корпусө, сувтө-дिसны шойччыны. Стөчджыка кө шуны, эз шойччыны, а ёнмөдчыны миянө воысь выль йөзөн, орудиеясөн.

Сталинград вөсна тыш, Курскөй дуга, мукөд пос-ныдджык бойяс — ставыс тайө ёнакодь изис-нетшкис миян бригадалысь ловъя вын да техника. Ёнмөдчышт-ны быть вөлі колө, өд водзын вөліны вөрөглөн му вылын косьяс, Берлин вөсна тыш, фашизмөс дзикөдз пасьвартан луньяс.

Эз удзөдны и миянлысь расчётнымөс: сетісны выль орудие, а важсө, коді кутіс нин гуля-голякывны важ телега моз, ыстісны дзоньтавыны.

Миян миномётной батальон ассьыс палаткаяссө сувтөдіс көрт туй станциясянь неылө, сикт дорө.

Сө кызь миллиметра полкөвой миномётлы ми ставөн вөлім зев радөсь. Но быд выль оружиеөн, бойө пыртөдз, колө бурджыка төдмасьны, велавны сійөн бурджыка лыйсьыны-инмавыны. Та могысь бата-льонса командуйтысьяс бөрыисны көрт туй сайысь кушин, көні эськө пудья минаяслөн взрывайтчөмыс эз вөч лексө ни сиктса йөзлы, ни асланым войскалы. Взводса командир шуис кыскыны миномётсө ас вы-ланым, сы вөсна мый машинаөн сэтчө он вөлі сибав.

Мөдөдчим. Топыд туй кузя тонна джын сьökта миномёт гөгыльтчис, позьө шуны, кокниа. Но кор ке-жим паськыд туй вылысь да мөдөдчим керөс паныд, пондім буксуйтны. Кольөм войө зэрыштөма да кок улын вөлі нильөг. А гураньясө вель дыр кезлө шнөпкысьлім.

— Раз-два! Взяли! — горзіс взводной, ыджыд да

ён лейтенант Соловьёв да ачыс тшөтш йөткис миномётнымос паськыд пельпомнас:— Но-о-о...

Миномёт, отаро-модаро катласигтыр, муртса муныштліс водзо, а сэсса бара на пырөдчис йөткыштны мянөс, мудзөм салдатыясөс, керөс ньылыд.

— Көть эськө өти вөв татчө! Гужиясас эськө көрталім гез— и өти здукөн воим места вылөдз!— мудзөмысла кашкигыр сёрнитіс салдат Козленко. Сійө вөлі мян пөвстын медся арлыда, мукөд серти сылөн медся уна вөлі и войналөн пасыс. Сьөкыд осколок чегөма сылысь пельпом лысө, а мод— парсыштөма чужөмсө вом дорсянныс пельөдзыс. Көдзыдьяс дырйи да кор сійө нервничайтіс, вурысыс лолі пемыдгөрдөн да пондыліс сырмыштны. Козленко яндысьліс таысь да кинас тупкыліс вурыссө.

— Көть эськө өти вөв вын,— выльысь шуис асыс мөвпсө Костя Козленко.

— Кутшөм нө налөн вөвьяс!— кызкө жалитана өвтыштіс кинас сиктлань расчөтса командир. Ми ставөн видзөдлім сиктланьыс. Сійө и збыльысь тыдаліс коньөр кодьөн; войнаөн чишкалөм шочиник керкаяс, а мукөдлаын чурвидзисны сөмын кузь пач трубаяс.

— Вөвьясыд эмөсь налөн,— нем виччысьтөг шуис украинец Иван Груша.— Тані жө колхоз. Машинаяс налөн абуось— тайө збыль. Но асывнас ме ачым кывлі, кызди бригадирыс тшөктіс гөрны...

— Старший сержант, мун ветлы, төдмав,— тшөктіс меным лейтенант Соловьёв, кодлы, буракө, дышөдіс жө йөтлавны миномөтсө.— Корлы өти вөв час джын кежлө. Шу, пыр жө бөр вайөдам.

Ме тэрмасигтыр мөдөдчи. Мыйөн вои сиктө, пыри медводдза керкаө. Сэні пу кровать вылын пукаліс лым еджыд юрсия да сэтшөм жө ус-тошка пөльө.

Сійö ноксис-разяліс дзугсьöм кулöм, кодi, буракö, вöлі зэв нин важ да öтарö орьясис.

— Ме юалi сылысь, кодi налөн танi медыджыдыс, кодлысь эськö позис корлыны вöвсö.

— Петрусь... Янович öнi ыджыд пыддиыс миян,— вочавидзис пöль ме вылö пöрысьысла чусмöм синьясөн видзöдiгтыр.— Менö вöлі пуктöны, да öткажитчи: синьясөн омöля аддза дай сьöкыд пеля. А сiйö...—пöльö косталыштiс да содтiс:—Миян сиктын сiйö да ме сöмын и колим мужичöйясыс. А сэсся ставыс бабаяс. Ачыд тöдан, бабаяс — бабаясөн и кольöны. Бригадирö пуксьöдiм мужичöйöс...

Сикт мöдар помас ме казялi детинкаöс, кодлы позис сетны ар дас нель-дас вит. Сiйö вöлі сöстöм, кельыд чужöма, вöсньыдик веськыд ныра да лöз синьяса, кажитчис не арлыд сертиыс стрöгөн. Ме сiйöс суи öти миномётчик дорысь, кодi керка мудöд вылын рузумөн чышкаліс-весалiс аслас батальоннöй миномётлысь стволсö.

Детинка недыр педзыштiс миномётчик дорын да корис видлыны сьöктасö плиталысь. Мöдыс нюмьёвтiс да тшöктiс. И миномётлөн дас кык килограмм сьöкта плита лои детинка пельпом вылын. Сэсся тайö сьöктанас зонка котөрөн сорөн кытшовтiс дворöд.

Ме пондi дивитны салдатöс:

— Дойдан öд мортсö, мыйла сетан та сьöктасö!

Миномётчик букуша видзöдліс ме вылö да тайö видзöдласнас быттьö шуис: «Тэнсьыд кө оз юавны, эн суйсьы! Асьным тöдам мый вöчам!»

Детинка видзчысьöмөн лэдзис пельпом вывсьыс плитасö мудöд дорö да меланьö бергöдчыштöмөн шуис:

— Менымтö мый! Ме сöмын видлі. А вот батьöй менам татшöмсö нуис Сталинградсянь Днепр сайöдз.

Гашкё и ылөдзджык на ковмас нуны.— Сійö пыдісянь ышловзис, сэссия содтіс:— Вермыласны кө эськё фашистьясөс да гортö волас батьöным, сэки эськё мамөкөд пөттөдзыс шойччөдам сійöс. Мед көть пöрысь-мытөдзыс нинөм оз вöч, ми асьным ставсö керам-вöчам.

Меным син улö веськалісны детинкалөн киясыс: потласьöмаось, гырысьöсь, тайö киясыс быттьö эз вöвны сылөн аслас.

Кор төдмаліс, мый ме корся бригадирөс да казьтышті сылысь ним-вичсö, детинка яндысигмоз нюмуніс да шуис:

— Петрусь Яновичыс — сійö ме...

— Тэ-э?.. Бригадир?.. Петрусь... Янович?

Менсьым чуймөмөс казялөм бöрын стöчмөдіс яндысьöмысла гөрдөдыштөмөн:

— Менö тай бöрйисны... Прамөй мужикьясыс сиктын эз кольны да... Тіян вотөдз вөлім куимөн — ме да ещö кык дед. Но öтисö, тіян воан вечерняö, фашистьяс дур поньяс моз виисны. Кыкөн сэссия колім...

— Бригадир ёрт, миянлы эськё öти час джын кежлө колö вöв, выль миномёт чой паныд кыскыштны,— юалі ме.

— Вöв?— ёна шензьөмөн шуис томиник бригадир.— Вöлыд миян ни öти абу...

— А мыйөн нö гөранныд-көдзанныд?

— А со тай, видзөдлөй,— шуигмозыс зонка нюжөдіс кисö.

Ме видзөдлі керкаяссайса му вылө, и сьөлөмөй менам лөкысь песовтчис морөсын. Му кузя миянлань сьөкыда тапсьөдісны-воисны нывбабаяс, найö вөліны доддьясьöмаось гөр дінö. Репинлөн бурлакьяс моз. Тырөм лов шыа гөлөсьяснаныс найö ышөдаліс-

ны өта-мөднысө да ньөжйөникөн кыссисны водзө. Муыс вөлі косьмыштөма, артмөма корка, вильыш төв ныр кыпөдіс бус, коді лясіс нывбабаяслөн пөсялөм чужөмъясө.

— Со мян вөвъясным,— жугыля шуис зонка да друг уськөдчис котөртны гөрысьяс дінө.

Ме повзи юрын друг чужөм мөвпысь: мися, колхозницаяс төдмаласны, мыйла на дорө воис салдат татшөм сьөкыд кадө да пондасны дивитны,— ме тшөтш котөрөн сорөн мөдөдчи асланым расчөтлань.

— Но мый, ыстасны вөвсө?— юалис лейтенант.

Ме кыв ни джын шутөг матыстчи лейтенант дорө, кори сылысь бинокльсө, корси гөрысь нывбабаясөс, а сэсся бөр сеті бинокльсө лейтенантлы да инді, кытчө колө видзөдны. Бинокль пыр тасянь, керөс вывсянь, гөрысьяс вөлі тыдалөны быттьө ки пьдөс вылын.

Мыйөн сөмын лейтенант матыстіс бинокльсө син дорас, чужөмыс быттьө сылөн топаліс, лои кузьмөс-джыкөн. Сэсся, сьөкыда ышловзьөм бөрын, сійө сетіс бинокльсө Козленколы. Ме казялі, кызди Козленко чужөм вылын пондіс сырмыны вурысыс, но өні мортыд вунөдіс тупкыны сійөс ки пьдөснас. Сэсся бывалөй салдатлөн чужөмөд исковтісны кык синва войт...

И пырысь-пыр жө, некутшөм командатөг боецьяс кытшалісны сьөкыд миномётнымөс, кутчысисны сы дінө. Первойя выныштчөмысь жө миномёт чеччыштіс места вывсьыс керөс паныд. И ми өти здукөн вайөдім сійөс индөм огневоёй позиция вылөдз.

А ещө ми кылім асланым сьөлөмъясысь пөсь көсийөм: воддза дорысь ёнджыка нөйтны фашистьясөс да өдйөджык помавны муством война.

## ТУЛЫС ВОСЬЛАЛІС ВОДЗЁ

**М**айор Буковёс тшөкыда корльвлісны корпусса политотделё, медым сетавны индөдьяс: од сійё бригадаса командирёс политчасть кузя вежысь. Со талун майорёс бара срочнө корисны сэтчө.

Кенигсберг босьтөм бөрын налөн мотомеханизированнойной бригадаыс, коді вөлі пырө 1-й танкөвой корпусё, сувтіс да овмөдчис жуглөм кар лунвыв помын, пөшти дзик Балтийскөй моредорса уна судта керкаяслөн пөдвальясын, да виччысис виль приказ. Карсө лои босьтөма сьөкыда. Кытшалөм бөрас нин фашистьяс мый вынсьыс водзсасисны, некыдз эз көсьыны сетны. Надейтчисны, мый найөс мездасны на асланыс войскаыс. Та вөсна и лои карсө зэв ёна жугөдөма. Майор Буков аслас машинаөн талун сьөкыда пьськөдчис корпусса политотделё, коді вөлі көнкө Инстенбургскөй шоссе вылын.

Талун Буковлөн сьөлөмыс инас эз өшыы. Картыс мунігөн на майор тшөктіс сувтөдны машинасө, морөсөдз чургөдіс юрсө кабиналөн осьса өшиньөд.

— Лейтенант!— горөдіс сійё.— Збыльысь-ө войнаыс помасис?

Лейтенант Михайлов, дзик на виль формаа, ни өти орден да медальтөм, киас планшет, сулаліс киссьөм өшиньяса костёл кильчө помын, кодлысь сигөрсө нөбалөма-чашнитөма снаряд. Сійё зумыша видзөдліс Буков вылө да лэптыштліс көясө: нинөм пө ог төд.

Лейтенант пьдди шыасис машина кузовын пукалысь радист Лутошкин, коді вөлі Игнатов шофёрлөн первой другөн да, кор төдмаліс политотделё майорлөн мунөм йылысь, тшөтш вөзйысис прөгуйайтчигмоз ветлыны накөд. Майор эз өткажит, но тшөктіс сьөрсьыс босьтны рациясө. И со тайө Лутошкиныс өні

тшөтш суйсис майор да лейтенантлөн сёрниö. Сийö шогпырысь шуис:

— Ме асывбыд волнаысь волнаö чеччалі, корсьыси эфирын, но кыпыд, гажа музыка кындзи нинöм эг кый.

— Ті Инстенбургö?— юалис лейтенант.

— Сылань,— вочавидзис майор Буков.

И лейтенант Михайлов, весиг эз вöзйысь, тэрыба кавшасис грузöвик кузовö: Кенигсбергсянь Инстенбургскöй шоссе вылö петöм бöрад пö асланым штабöдз мунны сюрас машинаыд.

Карысь петöм бöрын машина тövзис нин шоссе кузя, Восточнöй Пруссия му вывті. Тасянь фашистскöй Германия уна во чöж лöсьöдчис лөк зверь моз и Польша вылö, и Сöветскöй Россия вылö уськөдчыны.

Майор Буковлы окота вöлі корпуснöй политотделын сёрнитыштны öтитор-мөдтор йылысь. Война кө помасис, абу-ö гортö кад? Збыльысь. Сийö инженер-электрик, и уна сё пöv унджык пöльза ваяс, кызди инженер.

Машинаын пукалігөн сийö полігтыр унаысь ачыс ассьыс юавліс: помасис али эз на помась войнаыс, лэдзасны оз сийöс гортас? Тайö вояс сийö первойысь мөвпыштис сы йылысь, мый регыд воас аслас гöтыр дорö, кияс вылас босьтас да вылö лэптас ассьыс ичöтик нывкасö, коді кольлі рузум пиö гартыштöмөн на. Кутшöм ыджыд шуд, мый сьöкыд, страшнöй война коли бөрö! Но помöдз эскынысö полис на. Та вöсна и мучитчис, эз аддзы аслыс места.

— Майор ёрт, позьö нöшта öти папирос?— корис шофёр Игнатов. Сийö сöмын на сьövзис вомсьыс чигарка помсö, но нервничайтöмысла колі куритны и куритны.

Буков перйис öти папирос, мундштукладор пом-нас суйис Игнатовлы вомас да матыстис öзтöм зажи-галкасö.

— Аттё,— шуис Игнатов, чöv ланьтлис, сэссия сод-тис:— Ог радейт тайö туйсö. Мунан быттё кладбище вывти.

Буков сідз жö эз радейт видзöдны туй öтар-мöда-рö: гөгөр ставсö пузувтöма, пасьйöма-жулльöма.

Километр дас найö мунисны öта-мöдыслы кыв шутөг.

Матысмисны ю дорö. Берег вылас чукөрмöма ты-рыс машина. Виччысьысыяс висьталисны, мый пос шö-рас веськалöма снаряд. Да и Буков ачыс аддзис кыр йывсянныс, кыдзи сапёръяс тильсисны-мырсисны, медым бөр лöсьöдны поссö.

— Да-а... Тайö историяйд, буракö, оз регыдөн помась,— шуис Буков дорö матыстчысь лейтенант Михайлов.

«Кутшöм тайö история? Настоящöй авария»,— ду-мыштис майор.

Найö бөр мунисны машина дорö. Игнатов босьтис ведра да лэччис ю дорö, медым вежны радиаторыс васö. Туй шуйгаладорас вöли снарядъясөн да бомба-ясөн джынвийö жуглöм-пазöдöм здание, көни вöв-лöма коркö гостиница. Сэтчö и мөдöдчисны Буков, лейтенант Михайлов да радист Лутошкин.

Лэччысь шондi югөръясысь улi судтаас ыджыд кухняын синъяс ёртöдз югьялисны-дзирдалисны еджыд кафельнöй стенъяс да джоджъяс. Джоджас жö куйлисны ас кок йывсьыс пөрöдöм шлипуйтöм шкапъяс, кодъяс вöлины тырöсь жугалöм пöсудаөн. Ичöтик пызанъяс вылö, вывлань кокъясөн, пукталöма-öсь вужйысь кыöм улöсьяс. И на серти кажитчис,

бытьё буретш öнi кодкö лöсьöдчис танi мыськыны  
няйтöн тырöм джоджъяссö.

Радист сьöрсыйс пыртiс рациясö. Сийö первойсö  
трачкакылис, шутьялялис, а сэссия юрöбтiс музыка. Иг-  
натов тшöтш жö локтiс. Кык офицер да шофёр кыв-  
зiсны музыкасö. Нинöм мöдтор эз кыв, тыдалö, став  
мирыс тырöма музыкаöн, кодöс сетö Москва!

— Чöv кö олöны, сiдзкö, эз на помась,— ыджыда  
ышловзис Буков.

— Дзик нинöм вильсö оз сетны!— шога шуис  
радист.

— Эз, сийö эз на помась,— сьöкыда лолыштiс  
шофёр.

— Буракö, войсö ковмас коллявны танi,— шуис  
лейтенант Михайлов да петiс машина дорö. Сэтысь  
сийö вайис консерв банка, нянь да газетö гартыштöм  
сакар торъяс. Буков банкасö восьтiс да пунктiс сийöс  
джоджö вольсалöм плащ-палатка шөрö. Мыйлакö  
сёйны эз вöv окота. Кажитчис, ставсьыс кылис бензин  
дук.

Игнатов зэв виччысьöмөн, öкуратнöя вундалис  
чорзыйштöм салдатскöй нянь.

Ужын бöрын радист бара кутiс ноксьыны аслас  
рация дорын.

— Но, сэссия мый кутам вöчны?— зэв шогпырысь  
шуис сийö.— Рация дзикöдз дугдiс уджавны, тыдалö,  
машинаын тракöдöмысла.

— Сiдзкö, сiдз нинöм огö и тöдмалöй,— гажтöма  
шуыштiс Игнатов.— Гашкö, танi мяян туплясигкостi,  
код тöдас мый нин лои.

Сийö кыпöдiс шынель воротниксö да петiс узьны  
машинаас. Буков да Михайлов вольсалисны джоджас  
плащ-палаткаяссö, юр ув пыдди пунктiсны шынельяс-  
сö, а сэссия, пистолетьяссö да сапöгъяснысö пöрччы-

төг водісны. Радист кольччис ноксьыны аппаратнас: сьлөн шуйга киас вöлі карманной пöнариск.

Буковлы сапöгсö пöрччитөг куйлыны эз вöв лöсьыд, но дырөн унмовсьыны жö кутіс. «Мед война кö на тавой,—ун йылысь мөвпаліс сійö.—Аски бөрö колясны тайö сьöкыд воясыс. Нель во чöж мучитчөм, сы мында жертваяс! Ставыс тайö кольö бөрö...»

— Майор ёрт, капитуляция!—горөдіс радист.

Буков чеччис да матыстчис Лутошкин дорö.

Радист кикарнас чышкыштіс ньылөдөм чужөмсö да лётмуні места вылас, быттö вöчис ас олөмас медбөръя да медся колана удж.

Вöлі вой шөр бöрын мөд час. Майор Буков петіс ывлаө. Руа, шоныд, чөв вой вевттис му веркөссö сідзи, мый матігөгöрысь нинөм эз тыдав. Буков матыстчис машина дорö. Игнатов кыліс кок шыяссö да чеччыштіс кабинасьыс, кöні сійö узис.

— Но мый? Мыйкö кыйис эз Лутошкин?—юаліс шофёр.

— Сöмын на висьталісны Москвасянь, Игнатов ёрт,—кыпыда шуис Буков.—Германия капитулируетöма.

Майор да шофёр топыда шымыртісны öта-мөдсö да окасисны.

— Ме жö сэк на шулі, кор немец топөдіс мянөс Волга бердö Сталинградөдз зырөм бöрын. Мися, тайö тадзи и лөö,—сераліг да шуда синвасö чышкалігтырйи шуис Игнатов. Шофёр збыль эскис, мый сійö сэки стöч тадзи и думайтліс да весиг шуліс тайö майскöй вой йылысь, победа шедөдөм йылысь.

Майор Буков тшөтш уськөдіс төд вылас война заводитчан страшной войсö да сійöс, мый думайтліс сэки. Сійö чорыда эскис, мый татшөм шуда войыс, победа войыс, коркö лөö.

Найö бөр пырисны джынвыйö жуглём-киссьём гостиницаö. Рацияысь кыліс зэв кыпид, гажа музыка. Лейтенант Михайлов, кительсö пельпомъяс вылас павгёмön, пукаліс шога.

— Но öні регыд гортъясö!— нимкодясис Игнатов.— Сыктывкарын эм менам Тиюк... Сылань и веськöдча.

— Тэ Сыктывкарысь?— юаліс Буков.— Кывлі. Тшöтш кывлі Воркута йылысь, Ухта йылысь...

— Ті, гашкö, кыськö сыланьысь жö да?— майор вылö сюся видзöдліс Игнатов.

— Абу,— шуис Буков.— Ме сибиряк. Но Ухталөн да Воркуталөн войнадырся отсöг йылысь газетъясын ёнакодъ гижлісны. Сэсся менам вöвліны сыктывкарса тöдсяс.

— Месö абу дзик Сыктывкарсысь, а километр ветымынсайса лесопунктысь. Тиюкöй мунöма Сыктывкарас велöдчыны технорукö, сійön и кар йывсьыс мөвпала. А сідзисö Сыктывкарыд миян зэв мича кар. Пукалö Сыктыв юлөн джуджыд-джуджыд берег вылын, а ю саяс пляж. Паськыд эрд саяс ылын-ылын лöзалö парма! Ок, мича серпас!

Михайлов пукаліс чöv ланьтöмön. Майор видзöдліс сы вылö:

— А тэ, лейтенант, мый шогö усин?

— Сёрми, майор ёрт,— шуис Михайлов.— Сöмын помалі лётной школа, лöсьöдчи пуксьыны боевой самолёт вылö, а война помасис. Весиг усьём батысь эг удит водзöс бергöдны.

— Нинöм, лейтенант ёрт,— ышöдіс майор.— Рөдиналы век позьö вöчны уна сэтшöмтор, мыйысь тэнö и ошкасны, и наградаясөн пасъясны. Мед сöмын сьöлөмсянь уджалін.

— Мирной оломад лётчикьясыд колöны жö,—

шыасис Игнатов.— Войнаөдз найö шедöдлісны эз ичöt слава.

— Постö эштöдöмаöсь!— горöдіс ывлаö петавлысь радист Лутошкин.

— Командир ёртъяс, мөдöдчим!— чеччис Игнатов.— Татшöм здукъясö нюжмасьны оз позь.

Найö ставöн уськөдчисны машина дорö. Буков да Игнатов пырисны кабинаö, а лейтенант Михайлов да радист Лутошкин кавшасисны кузовö. Машина öдöбтіс места вывсьыс. Вöвлытöм ыджыд радлун шымыртіс ставнысö. Машина вуджис юсö да төвзис нин шоссе вывтi. Буков ылаліс аслас думъясөн.

— Со видзöдöй, майор ёрт,— Инстенбурглань индіс Игнатов.

Буков восьтіс кабина öдзöссö да чеччыштiс войся лысваöн кötöдöм асфальт вылö.

Шоссе öтар-мөдарын муяс заводитöмны нин вежöдны, му весьтö öшйылöм ру разалöма. Асыввылын, вөр ді сайын, муртса заводитöма öзйыны асья кыа. И друг кыпöдчисны да разалісны көнкö енежас уна рöма бияс.

— Салдатьяс гажöдчöны,— завидьтöмөн шуис Игнатов.— Мунам водзö, майор ёрт. Öдйöджык колö бөр воодчыны асланым частьö: миян, көнкö, празднуйтöны жö нин.

Майор Буков чöv усьлі, сэсся аслыс моз шуис:

— Сылы ми век лоам паныд!

— Кодлы?— эз гөгөрво Игнатов.

— Войнаыслы!

— Дерт жö,— шуис шофёр да вөрзьöдіс машинасö.

А тулыс, война помасян тулыс, восьлаліс водзö!

## ЛӨНЬ СИКТЫН

Совхоз отделениеөн веськөдлысь Николай Цыпанов виччысис карса уджалысьясөс. Вооны пö кутшөмкө министерствоысь. Кутшөм со йөз-а? Гашкө, ставыс краситөм вом доръяса да кузь гыжь-яса дзодзөгъяс, кодъяслы зывөк лукйысьны муад?.. Нинөм он вөч, кутшөмось эмось — ас выныд кө оз тырмы, көть кодлы рад лоан.

Цыпанов кузя ышловзис: да-а, уна колö арнад йөзид.

А со и автобус тыдовтчис, сэсся пондiс кывны гажа сьыланкыв. «Съывнысö тай наперво кужöны-а!» — не то долыдпырысь, не то дөзмөмпырысь шуис ас кежас Цыпанов.

Йөз тыра автобус сувтiс. Шарс воссисны өдзөсь-яс, и карсаяс ыльөбтiсны-петiсны контора водзö да пондiсны чатрасьны öтарö-мөдарö. Тайö вöлины кыз-выннас лөсьыдiник нывъяс, кианыс неыджыд чемоданъясаөсь, а кодi и польдчөм сеткаа.

— Пөсь чолөм дона гөстьяслы! — шуис Цыпанов да казялiс, мый волнуйтчыштö.

— Чолөм, кавалер! Код нö эськө тэ сэтшөмыс лоан? — пырысь-пыр жö гажаа шыасисны öткымынөн.

— Управляющöй ме... Цыпанов.

— Но-о?! Сэтшөм на том, а управляющöй...

Татшөм кывъяссьыд Цыпанов весиг гөрдöдыштiс. Сидзсö сiйö эз нин и сэтшөм том вөв — кызь сизим арöс нин мортыслы, армия бöрас нин помалiс сельхозтехникум... Но сiйö вöли еджгов, гөгрöс чужөма и первой видзөдлөм бöрын збыльысь кажитчис том-иник зонмөн.

— Ёртъяс, тiянлы колö бöрйыны аслыныд брига-

дирӱс.—Цыпанов бергӱдӱс сӱрнисӱ мӱдарӱ.—Мед эськӱ ми сы пыр став йитӱдсӱ кутӱм.

— А мян эм нин бригаирид!—вочавидзисны воӱмаяс.—Агния Михайловна.

Цыпановлань воськовтӱс пелькиник тушаа, лӱз спортивнӱй костюма ныв, киас сӱйӱ кутӱс турунвиж рӱма плащ. Мугув чужӱм вылас ворсӱдчис нюмтор. Шуйс сӱдз гӱлӱсӱн:

— Менӱ индӱсны.

Цыпанов тӱрыба видзӱдлӱс ныв вылӱ и друг думыштӱс: «Хы, мужичӱйяс эмӱсь, а тайӱс со индӱмаӱсь бригаиринас!» Сӱсся шуйс:

— Зӱв бур, сӱдзкӱ... А ӱнӱ мунамӱй патераясӱ. Морт вит-ӱ-квaйтӱн быд керкаӱ лоӱ овмӱдчыны. Кӱзьякаясыскӱд ме сӱрнитӱ нин.

Варов чукӱрӱн мӱдӱдчисны катыд помлань. ӱна вензӱйтӱг воӱсыяс тӱрӱдчисны нӱль керкаӱ. Кыкас — мужичӱйяс, мукӱдлаас — нывбабаяс да том нывӱяс. Паськыд пу койкаяс, гӱбӱч вывӱяс, виль идзасысь кыз вольпасьяс карсаяслы воисны сӱӱлӱм выланьс.

Сӱк костӱ управлӱющӱй пукалӱс кильчӱ вылын дӱ куритчигмоз кывзӱс, кыдзи визув нывӱяс, гажаа сера-лӱгтыр, меститчӱны виль местаын — мыссьӱны-пась-тасьӱны, шильӱдчӱны-мольӱдчӱны. «Нывӱясыд — век нин нывӱяс!» — ас кежас нюммунис Цыпанов. Сӱсся бара думыштӱс: — «Кыдз со бара тайӱяс вит гектар картофельсӱ керасны-а!..» Сылысь думайтӱмсӱ торкис карса бригаирилӱн гӱлӱсыс:

— Аттӱ кватираяссыд, Цыпанов ӱрт. Лӱсьыда меститчим...

— Дерт, абу карад кодъ...

— Зӱв лӱсьыд, мый тӱ!.. Торӱӱн нин идзас воль-пасьясыс.

— Но и бур, кажитчис кӧ,— долыдмис управляющӧй.

— Цыпанов ёрт,— водзӧ сёрнитис бригадир,— коліс тай нӧ му участоксӧ видзӧдлыны.

— Аски, гашкӧ,— быттьӧ водзасъыштис мӧдыс, кӧть эськӧ и аслыс кажитчис нывлӧн татшӧм кӧс-йӧмыс.

— Аски кежлад ӧд тырмас на уджыд,— нюмуніс ныв.

— Сідзкӧ, ветламӧй. Контора водзын мотоцикл сулалӧ...

Муртса на мӧдӧдчисны бригадира-управляющӧя, кыдзи на дорӧ котӧрӧн матыстчисны кык ныв.

— Агния Михайловна!— ӧта-мӧд вежмӧныс шыасисны найӧ.— Ми, гашкӧ, клубӧ ветлам? Йӧктыштны окота...

— Сӧмын мед аски эз вӧв нёрпасьӧма— водз садьмӧда!— велӧдіс бригадир. «А такӧд, буракӧ, уджыд и артмас!»— бара ошкана думыштис бригадир йылысь Цыпанов.

Мотоциклнад ӧдйӧ и шуркнитисны сикт кузя, петисны ыбъяс вылӧ. Агния Михайловналӧн юрсиыс тӧлалӧ ӧдйӧтӧ мунігӧн, синъясыс югъялыштӧны. Кар-тупель му паськыд, шылъыд, ылын тыдалысь вӧр дорӧдз пласътвидзӧ. Вильыш тӧвру шпорӧдчӧ сук кар-тупель кор пытшкын, коді прамӧясӧ абу на удитӧма вижӧдны.

— Да-а...— ышловзис Агния Михайловна,— тані коскыд чегыштас.

— Ёна тай... вит гектарыд этатшӧм йӧзыдлы— тшак ва.

— Зыр помсьыд! Энӧ бара шуӧй!.. Машина онӧ жӧ сетӧй-а. Кӧнкӧ, думайтанныд, карсаястӧ пӧ позьӧ и уджӧдыштны. Ӧтчыдтӧ... Сідз ӧд?

— Гашкө, и сідз,—серөктіс Цыпанов.— Вөліс кө машинаыд, эз эськө ков и тiянөс корны... А кык швырлякыд отделение вылө эм да, кодлы найөс юкан. Комбайн жугалис-а. Гашкө, лун-мөд ковмас ремонтируйтны. Вот и лоө, кыті вөлөн да кыті зырйөн.

Чөв олыштісны, видзөдісны енэж рытив юкөнын лэччысь шондіөн мичмөдөм кымөръяс вылө.

— Сэссия нө век тадзи, карсаяс отсөгөн, урожайтө идраланныд? Быд во?

Мөдыс кызөктыштіс, ышловзис да мыжмөм морт моз шуис:

— Лоө тай, мый сэссия вөчан. Асланым йөзыс оз тырмы да. Унджык уджалысьыс пөчөяс. Бур ещө, уджалөны на, көть и пенсия вылынөсь.

— А том йөзыс?

— Том йөзыд этша. Карыд миян матын, да ныв-зоныд сэтчаньджык сетчөны. Көть эськө и сиктад нин позьө не омөля овны.

— Да-а,—Агния Михайловна ещө өтчыд видзөділіс гөгөр, көсйис шуны мыйкө, мед бурмөдыштыны управляющөйлысь сьөлөмсө, но эз шу. Юалис сөмын:— Сідзкө, таті, дорөдыс, миянлы?

— Таті, со тай беддыс сулалө,—сэтчөдз.

Найө бөр воисны сиктө. Цыпанов индіс бригадирлы, кысь позьө босьтны көрзинаяс, мешөкъяс да зыръяс. Видзөдліс ныв вылө тыр синмөн, юалис:

— Сідзкө, Агния Михайловна, аски тшөктытөг и петанныд?

— Дерт жө... Сөмын керөм картофельсө кыскыны мыйкө мөдөдөй-а.

— Та вылө машина миян индөма. Ковмас, дерт, аслыныд сөвтны-ректыны тшөтш отсавны.

...Войнас Агния Михайловна вөтасис лөк вөт. Бытьө сійө чуксалө асьыс бригадасө му вылө петны, а

некод оз кӱсйы. Ми пӱ эг ас вӱляысь татчӱ локтӱй, мед пӱ сиктса йӱз асьныс керӱны картупельсӱ. Ми пӱ тай найӱс ас пыдди огӱ тшӱктӱй уджавны...

Агния Михайловна быттьӱ кутіс янӱдны нывъясӱс: сӱйны пӱ тай нӱ быд лун коранныд, дай ещӱ чӱскыд-джыка на. Нинӱм пӱ тӱянкӱд оз ло, кӱть и ӱтчыдтӱ отсыштанныд сиктса йӱзлы.

Татчӱ Агния Михайловна садьмис. Пӱсялӱма, сьӱкыда лолалӱ. «Вӱтассяс жӱ этатшӱмтор!»— Ныв кыз-выннас тӱдіс бригадаса йӱзӱс, тӱдіс, мый уджсьыд некод оз понды пышьъявны.

Керкаса кӱзьяка вӱлі чеччӱма нин, гольӱдчис пач водзын укватӱн.

— Садьмӱді?— повзьӱм сорӱн юалис кӱзьяка, кор казьяліс жырйысь петысь Агнияӱс.

— Ачым садьми, оз узьсы мыйкӱ.— Пуксис кывт лабичӱ, пондіс видзӱдны ломтысьысь пачӱ.— А ті тай зэв жӱ водз чеччанныд, Петровна?

— Тайӱ нӱ водз? Вит часысь нин петӱма да. Водз-ті водзсӱ чеччылім, кор челядь гортынӱсь на вӱліны, да ковмыліс пӱжасьны... А ӱні ӱд нянтӱ лавкаысь босьтам. Миянлы кыкӱныдлы стариккӱд уна оз и ков.

— Челядьныд нӱ важӱн нин абу дӱнаныд?

— Коді кыззи. Ӑти пи, медыджыдыс, война вылын усьлі. Со тай карточкаыс жырйын ӱшалӱ. Кагаӱй менам, олӱмсӱ эз и аддзыв...— Петровналӱн кӱтасисны синъясыс. Сэссия пӱрысь нывбаба содтіс:— Мӱд пи Воркутаын, шахтаын уджалӱ. Медічӱтыс — нывка, сӱйӱ мян пельшер, леспромхозын олӱ, верӱс сайӱ сэтчӱ петіс. Старикӱй ӱні буретш гӱститӱ ныв ордас.

— Асьныд, ме видзӱда да, век на жӱ уджаланыд?

— Омӱль нин ме уджалысьыд,— Петровна ӱвтыштіс кинас.— Толькӱ нин мода вылас петыштлан...

Уджалысьыд этша, да яндзим гортын весьтö пукавны. Сьёлöмыд висьö жö, мед эськö картопель-няныыд лым улö эз коль.

Ошинь улын таркмунис мотор шы да регыдöн бөр ылысмис.

— Микол со бара жö нин журъялö,— шуис кöзьяка.

— Кутшöм Микол нö?— эз гөгөрво Агния.

— А управляющöйным...

— Зиль морт, тыдалö, управляющöйныд тiян?

— Миколыс? Зиль. Душасö пуктас овмöс вöснаыд.

Ёна жö лöсьыд шондиа арся луннад му вылад! Шоныд на, кос — он кынмы ни он няйтöссьы. Сэсся, ещö тэнö кö кытшалöны том йöз, гөгөр кö кылö серам...

Мужичöйяс босьтисны зыръяс, пондисны путкылявны картопель позтыръяс. Ружöктыштöмөн лэптыштасны, и, гашкö, ведра джын сярмунö картопельыс — сэтшöм гырысь да позтыра.

— Небось тай быдмöма, кöть и машинаөн пуктöмаöсь.

— Управляющöйыс пö налөн бур агроном: тöдö, кор да кызди пуктыны, кутшöм удобрение сетны.

— Абу тай дыш сылы ноксьыны куйöдөн. Ме кö сы местаын, важөн эськö карö утыышти.

— Чайтан, став йöзыс тэа-меа кодь дась нянь сёйысь!

Тотшкысьлöны-камгысьлöны кöрзинаясö да ведраясö сьöкыд да чорыд том картопельяс. Му вылö, салдатъяс моз, сувталöны тыра мешöкъяс.

— Ой, нывъяс, коскöй шöри чегö!— веськөдчиг-моз горöдис збой чужöма том ныв, кодi тöрыт ветлис клубö.— Гашкö, куритчам?

— А-а, чушис! Абу йöктöм кодьыд тани?— шуис

Агния Михайловна, но сылы век жö жалъ лои нылыс да содтіс:— Гашкö, ми мөдöдам Лидаос пусьыны? Мед картофель пуö да пöжалö...

— Мед пöваритö! Мед велöдчö, коркö, верос сайö петас да, кужныджык кутас.

Пажнайтігкежлö вайисны бак тыр йöv — асья лысьтöм, кöдзыд. Мудзыштöм бöрад ёна и чöскыдөн кажитчисны пöсь картофельыд да йöлыд.

Журкнитіс-воис аслас мотоциклөн Николай Иванович Цыпанов. Чышкалыштіс кинас бусöсьсöм чужöм-сö, шуис шензьöмпырысь:

— Но, ті тай уна нин гындöмныд.

— Чайтан, культураса уджалысьяс кö, сöмын сьывны кужам.

— Тэ кö ещö швырялкатö сетін, ми эськö пет-көдлім.

— Меным абу жалъ, ёртъяс, но ог вермы. Аслыныд жö оз ло лөсьыд, пöрысьяс кö пондасны зырйөн мудйысьны, а ті, том йөз, швырялка бöрся өктысьны.

— Агния Михайловна, вай тшöкты кодлыкö радейтчыны Цыпанов ёрт вылас. Сэки, гашкö, бурджыкөн ми дорö лоö!..

Пажнайтöм бöрын выльысь заводитны дыш. Мудзöма кос, мужикъяслөн öткымынлөн вабольтчöмны киясыс зырнысö чорыда кабыртöмысь. Пöt кынöм да сөстöм сынöдыс корöны ещö на куйлыштны веж ласта вылын, чуксалöны узыштны.

Но öд узигад картофельыд оз сод. Вит гектарсьыд муртса на гыжъялыштöма лои, гашкö, гектарсьыс витöд пайсö, кöть эськö и Цыпанов ошкыштіс. «Да-а, а йөзыс быд лун тані пессьöны, зэр кöть слöt,— паськыд ыб вылö видзөдігмоз думайтіс Агния Михайловна,— мыйта сёян колö куш сöмын миян карлы.

А тшөктасны ветлыны сиктө отсасьыштны, быдсяма помкаяс корсялам, мед сөмын не мунны... Со и лоо мырсьыны тани Петровна кодь бабьяслы, вунөдлыны пенсия йывсьыс...

А управляющөйыс, буракө, уналаө удитлө волыны лунтырнад. Со мый пасьтаөсь муясыс, урожайтө колө идравны. Йөзыд оз тырмыны ни. Сэссия урожайсө кытчөкө колө меститны — мый государстволы вузавны, мый төв кежлө кольны. Көнкө, скөт абу этша ни».

Уна дум бергөдчис Агния юрын, кор сийө, би дорын пажнайтөм бөрын, гатш водөмөн видзөдіс лөз енэжөд кывтысь шочиник кымөртөръяс вылө. Регыд мысти бригадир чеччис да шуис:

— Заводитлам кө бара-а?— Босьтіс ведра да мөдөдчис би дорысь. Сы бөрысь и мукөдъяс — коді зільджыка, а коді и зев неокотапырысь.

...Тадзи жө уджалісны карсаяс аскинас, керисны картофель, кыскалісны сийөс важ картаө, сөвтчисны-ректісны, унакөд төдмасылісны сиктын. А коймөд луннас управляющөй мөдөдіс налы швырялка. Сы отсөгөн карсаяс муртса эз помавны участокнысө.

Рытнас, кор Агния Михайловна мысьсьөм-вежсьөм бөрын пукаліс кильчө вылын, керка дорө шурк воис аслас мотоциклөн Цыпанов. Зутш сувтөдіс тэрыб вөвсө, чеччис, нюмъялігтыр шыасис бригадир дінө:

— Агния Михайловна, а ме тіян дорө мөгөн.

— Николай Иванович, наперво зев ыджыд аттьө швырялкасьыд. Сэтшөма сийө отсаліс миянлы.

— Ме өд абу жө кын сьөлөма, гөгөрвоа...

— А мөгныд кутшөм?

— Субөта локтө, Агния Михайловна. Миян йөз концерт көсийоны петкөдлыны... Гашкө, тшөтш высту-

питанныд!— пöся шуис Цыпанов.— Тi жö кужанныд-джык миян йöз серти.

Агниялөн югдiсны гырысь лöз синъясыс. Чужö-мыс и.

— А мый, Николай Иванович, отсалам!— шуис сийö.— Миян нывъяслы сьывнытö да йöктынытö оз на и ков ёна тшöктыны. Быттьö тöдiм. Миян и паськöм кутшöмскюрö эм,— бригадир шуис тадзи, а сьөлöм вылас лои шоныд, буракö, сыысь, мый аслас кывъясөн нимкодъмöдiс управляющöйöс.

Цыпанов радысла муртса эз кут Агнияöс киöдыс, пöся горöдiс:

— Сiдзкö, Агния Михайловна, тi ветлöй, пöжалуйста, миян комсорг дорö. Сийö ставсö котыртö.

— Öнi жö и мунам нывъяскöд.

Цыпанов заводитiс моторсö, журöбтiс-мунiс. Öнi сылы кажитчис, мый мотоциклыс тövзьö вöвлытöм öдөн — сы вöсна мый машиналы тшöтш отсасис морöсас вынөн пессьысь мотор.

Аскинас сиктын медся тыдаланаинъясын вöли ляс-йöдлöма мичаа рисуйтöм объявлениеяс. Талун пö сиктса клубын лöö концерт. Он кö пö волöй, кутанныд нэм чöжыд каитчыны. Кыдзи он во?!

Рытнас клубса заведущöй занавес сайсянь видзöдлiс воысьяс вылö, и быдсөн повзьиштiс — ставныс-ö тöрасны залö? Йöз воалисны и воалисны. Весиг орчча сплавучастоксаяс тыдалисны. Кодскюрöлы ковмис весиг сулавны, а челядь пукалисны дзик сцена дорас. Первойсö найöс эз кöсийыны лэдзавны, но на-төг öмöй мыйкö прöйдитас?..

Занавес воссис, зал надзён чöv ланьтiс.

Сцена вылö петiс Агния Михайловна да висьталiс первой номерсö. Сийö пасьталöма лым еджыд платтьö, вöсни коска, том, мича... Мöд радын пукалысь

Цыпанов, а сійö воöма мамыскöд, эз и вештыв ныв  
вылысь синъяссö. Мортыд весиг вель дыр эз велав,  
мый юасьö сылысь мамыс. А мамыс вöлі кöсйö тöд-  
мавны пиыслысь: коді пö татшöм рочаканыыс.

— Карса тайö, мамö, карса,— медбöрын вочави-  
дзис Николай Иванович.

Агния Михайловна пöся чолöмаліс чукöртчöм йö-  
зöс. Сэссия сёрнитыштіс карсаяслөн да сиктсаяслөн  
дружба йылысь. А öні пö видзöдöй да кывзöй.

Воссис занавес, и сцена вылын тыдовтчисны мичаа  
вышивайтöм ковтаа кык ныв — öтиыс карса, мöдыс  
сиктса — да сиктса аккордеонист Павел Митрей.

Зал быттö гызьыліс. Сы вöсна мый тайö нывъя-  
сыслөн кывйыс ёна лэчyd вöлі.

Сяркнитіс гажа перебор, и мича кык гөлöс, гора  
ельяс моз, öтлаасисны öта-мöдыскöд:

Ворс вай гажаджыка, гудök,  
Пöттöдз сыыламöй ми тан.  
Дыш да наян йöзлысь öтвыв  
Гогналам ми гуг и бан.

Куплет сыылöм бöрын нывъяс йöктігтырйи вöчис-  
ны кытшов. Сэссия зэв збылысь видзöдлісны залö да  
друг заводитісны:

Бригадирлөн зэв збой гöтыр,  
Мужикыслы сійö — грöз!  
— Мыйла уджавны ме кута?  
Воасны мед карысь йöз!

Залын ызöбтіс серам. Унаön бергöдчылісны шы-  
льыд чужöма нывбабаланы, коді дон гөрдöдіс. А сце-  
навывса нывкаяс сыылісны водзö:

Столөвөйса пөвар төдө,  
Кыдзи пуны шыд да рок.  
Во чөж сійө пөртиө лөдө  
Яйтөм ордлы, юр да кок.  
Асыввылын шондi петө,  
Рытиввылын пуксьылө.  
Быд рыт гөтрасьө руч Петя,  
Асывнас бөр юксьылө.

Збой нывъяс унаөс чушкалісны, уналы ковмис  
гөрдөдлыны да педзны улөс вылын.

«Молодечьяс!»— горзiсны залсянь.

Николай Иванович Цыпанов пукаліс шуда. Өні сійө  
көритыштіс асьсө, мый водзті сідзи думайтіс карса-  
яс йылысь: мый пө төлкыс лоө краситөм гыжъяс-  
сьыд!.. А со — гажөдөны йөзөс и уджавны кужөны.  
Николай Иванович думайтө, мый водзө вылө оз эсь-  
кө ков ордны тайө йөзыскөд йитөдьяссө. Найө  
эськө отсалісны кыпөдыштны сиктын культурасө. Кор  
асьныс волісны, а кор и кодөскө мөдөдлісны. Көдзиг-  
идрасиг бара жө отсөг и. Но төлка думьясыс пыр  
жө кусіны; зонлөн вежөрын, сьөлөмын бергаліс өт-  
нас Агния.

Клубысь петөм бөрын Николай колльөдыштіс  
мамсө, сэсся бергөдчис вөтөдны том йөзөс.

Вөлі пемыд, көть и кодзула, буретша ыркыд. Ни-  
колай Иванович тэрмасьтөг восьлаліс выль моски  
кузя, кодөс таво гожөм нюжөдісны. Водзын пондіс-  
ны кывны ныв гөлөсьяс. Өти гөлөс дрөгнитөдіс сійөс.

— А-а, Николай Иванович!— шуис Агния, кор на-  
йө, куимөн, өтвесьтасисны Цыпановкөд.— Но, вер-  
мим-ө кутшөмакө отсыштны?

— Мый ті!.. Ыджыд аттьө ставныдлы, Агния Ми-  
хайловна.

Бригадирлөн пöдругаясыс тöдлытöг öддзöдiсны  
воськовнысö, да ныла-зонма колисны кыкөн. Агния  
та вылö нинöм эз шу, гашкö, эз казав, а Николай  
Иванович радлис и öттшöтш повзъыштiскодь. Чöv  
олан костыс пондiс нюжавны, колö вöли мыйкö шу-  
ны, и зон шуис сiйö кывъяссö, кодъяс унаысь нин  
мездылисны татшöм здукъясö пикö воом йöзöс.

— А войыс талун кутшöм, Агния Михайловна!

Ныв серöктiс да гажаа шуис:

— Да-а...

Сёрни бара косталис. Öни нин сы вöсна, мый уп-  
равляющöйлөн пондiсны чужны зэв уна кывъяс, кодъ-  
ясöс ставсö кö висьталан, код тöдас мый думыштас  
Агния, карса да мича ныв.

— Агния Михайловна, ме зэв рад, мый тi воин-  
ныд миянö.

— Меным кажитчö жö тiянын,— вочавидзис ныв.

— Збыль?! А унаөнлы веськодъ сиктыд.

Николай Иванович чöv олыштiс, сэсся пöся шуис:

— А ме немтор вылö ог веж сиктöс! Мед сьö-  
кыдджык на овлö! Мед абуджык на карын кодъ га-  
жа! Ог веж... А сэсся, öтвылысь кö да бурджыка  
босьтчыны, мыйта позьö вöчны!..

Ныв чöv олис.

— Аски тi сэсся бөр лэччанныд карö,— дзугыля  
шуис Цыпанов.

— Да-а...

— Сэсся ми тiянкöд, гашкö, огö нин и аддзысь-  
лöй?— шуис тадзи Николай Иванович и кутiс вич-  
чысьны, мый вочавидзас Агния, карса да мича ныв.

## ПОДА ЁДЯ

**М**е вои Чуш сиктö, кöни коркö ёна важöн заводитли уджавны учительöн. Танi ме том дырйи унаысь любуйтчылi коми мунымлөн мича серпасьясөн. Гашкö, та вöсна и сиктыс, и сэнi олысь йöзыс пыр кежлö колины менам сьöлöмö.

Чуш сикт пукалис джуджыд ыбъяс да мылькъяс вылын, а вомöн ногыс юковтисны сийöс крут кыръяса куим шор: Мальёшор, Кычаншор да Грездшор, кодъяс визувтисны Сыктыв юö рытыввывсянь асыввылö. Найö и гожöм шөрнас дзикöдз эз косьмывны да гырысь зэръяс бöрын бузгисны-визувтисны ыджыд шумöн. Шоръяслысь кыпид бузгöмсö ме унаысь друг кывны заводитли и сиктысь мунöм бöрын, мыйысь чужлис сьöлöмын тувсов долыдлун.

Уна ва визувтис Чуш сиктын учителялöмсянь. И война пырид ковмис вуджны и мирнöй удж вылын не öти пöсь кисьтны. Кытчö нин эг волы Чуш сикт бöрын, кымын да кутшöм йöзкöд эг паныдасьлы, а кызди петi автобусысь, менö регыд мысти кытшалисны сиктсаяс, пöся да мелiа шыасьöм бöрын нюжöдчöны здоровайтчыны.

— Помнитан?— юасьöны.

— Кызд нö!— важсö синъяс водзö вайöдиг вочавидза ме.

— А помнитан, кызди тэ драмкружокöн веськöдлин, менö сюзь Матвейö пуктылин?..

— Тэ жö миян народмлөн вежай! Ветлам, видзöдлам выль клубнымöс!

Матыстчалисны выльысь-выль йöз. Менам вöвлöм велöдчысьясöй юасисны: «Тöдiнныд?..» Ставнысö тöдны вöли зэв сьöкыд. Но тайöс тöдi...

Гырddзаяснас йöткасигтыр ме дорö писькöдчис

нымбаба. Ме эг аддзы сылысь чужомсö. Югид рöма шöвк чышъяныс öтарö шлювдiс юр вывсьыс, код улысь ортсö петiсны юрси пратьяс. Медбöрын сийö пырöдчис ме дорö. Сылы эз ковмы юавны менсьым: «Тöдiн менö?»

— Дуся!— горöдöмөн шуи ме.

Сийö ёна волнуйтчис, шыасьтöг здоровайтчис мекöд. Синъясыс быттьö ворсiсны и вом доръясыс нюмъялисны, но öттшöтш нывбаба сiдзи лапйöдлiс синъяснас, кутчысис быттьö бöрддзöмысь, и öтарö лöсьöдiс юр вывсьыс чышъянсö.

— Кызди нö тi тöдiнныд менö? Öд ме сэтшöма нин пöрысьми?!— юалис сийö менсьым.

Сийöс сиктас шуисны Пода Öдяөн. Мыйла? Тыдалö сы вöсна, мый кöть кытчö мунiгөн Öдя быттьö гöгыльяс вылын тюрö — сэтшöм тэрыба восьлалö. Быттьö подөн ветлыны и чужлöма. И со тай, кодкö кужöма шуны первойөн: Пода Öдя!

Дуся вöли велöдчысьяс пöвстын медся гöльөн. Мамыскöд да чой-вокыскöд сийö олис юр пöла важиник керкаын.

Керкаас кык öшиньтор, му джодж. Да и нывкаыслөн чужöмыс вöли му рöма. Сы вылö видзöдлöм бöрын позьö думыштны, мый сийö мыйöнкö висьö. Чужöм дзибъясыс вöйöмаось, бледось, а голяыс вöсни да кузь. Нывка вылын пыр öти вушйöм дöра платтьö. Но синъясыс сылөн, и чужöм-рожаыс сюсь вежöра мортлөн. Мукöд дырйиыс нывка вежон чöжъяс эз петкöдчыв школаын. И сэки ачым ветывли на ордö, медым тöдмавны помкаяссö. Сийö видзис ассьыс ичöt чой-воксö. Мамыс мунлис удж вылö и кольлис ас бöрсяыс медыджыд нывсö, медым видзны, вердыштны мыйöнкö нель чоя-вокаос.

Кöть Дуся уна луньяс дорывыв эз вола школаö,

сійö эз коль мукöдъясысь велöдчöм кузя. Ме унаысь жуглі ассьым юрöс сы вылын, кыдзи эськö отсавны нывкаыслы. Кызьöд воясö олöм вöли сьöкыд. Гражданскöй война да Поволжьеын неурожай и миян вой-вылын тöдчисны. Но век жö школаын кыдзкö лöсьö-дiм пöсь сёян школьникъяслы. Луннас öтчыд мыйкö да мыйкö пулим: шыд, рок, картофель. Дуся жö ас-сьыс пайсö босьтліс бекарö, кодöс вайліс сьöрсьыс, да нуліс гортас, медым сійöс öтлаын сёйны чой-во-кыскöд. Öти тулысын ми сылы сетiм сапöжки, кодöс новліс лун кык-куим, а сэсся школаö бара воис кис-сьöм, уна дöмаса-розя важ кöмкотнас.

— Мыйла тэ бара важ кöма?— скöрысьмоз юалiм сылысь.— Кöни сапöжкиыд?

— Воклы сетi,— висьталіс нывка да мыжа морт моз копыртiс юрсö парта весьтö.

Кöть ми и зiлим дöмлыны нывкалысь олöмсö, но сійö эз быд пöрйö миянлы удайтчыв. Уна челядя дöва мам ордын налы быдмыны вöли сьöкыд.

Кыдзкö öти тулысын ме сыкöд паныдаси Сыктыв пöлөн шыльквидзысь видзьяс вылын. Дуся чукöртiс-нетшкис дзоридзьяс да сьыліс. Ме видзöдлі сылөн дозйö, чайтi, мый сійö тыр дзоридзьясөн, но сійöс нывка тыртöма абу дзоридзьясөн, а шома гум листь-ясөн. Сійö медводз чукöртöма гортсаыслы сёян. Чуш сиктысь бокын ветлігөн ме эг вермы вунöдны тайö гырысь синъяса нывкасö, кыдзи и Чуш сикт пöлөн бузгысь шоръяс. Сійö быд пöрйö сувтліс менам син водзö, кор кывлі челядьлысь бöрддзöм, аддзылі омöля пасьтасьöм нывкаöс либö зонкаöс. И сьöлөмöй ыркмунлас вöли.

Сійö кадсянь коли уна во. Ме бара паныдаси Дусякöд. Но талун сійö абу нин нывка, а дзормыштны-вошйöм нывбаба, совхозын полеводьяслөн бригадир.

— Никанор Фёдорович, ветламöй миянö. Ме кöсья, медым менам челядьöй аддзылісны тіянöс,— топыда кутіс менсьым киöс ме водзын сулалысь ичöтик тушаа нывбаба.

Пода Öдя — менам вöвлöм велöдчысьяс пиысь öти. Но сылы менö, кыдзи мукöдъяслы, ёна эз ковмы корны, ме вöлі дась мунны сы ордö пырысьтöмпыр, быттьö ме вылын öшаліс кутшöмкö груз, кодöс отсалас чöвтны Дуся.

И ме мөдöдчи. Дуся, Пода Öдя, оліс пыр на сійö жö кулигаас, коді вöлі ёна бокин мир туйысь, но эз нин пöлыньтчöм, виялысь важ керка пöлын, а кökьямыс пельöса, кык вежöса да кухняя вильöн стрöйтöм троньякылысь керкаын. Керка гөгөр йöрсö мичмөдісны уна пөлöс пуктаса градъяс. Мем кажитчис, мый Дуся татчö садитöма Сыктыв бердса видзьяс вылын быдмысь став пөлöс цветъяссö, кодъясöс коркö öктыліс-нетшкыліс ачыс, да сы ордö збыльысь воöма пыр кежлö гажа тулыс, мый йылысь коркö сійö мечтайтліс. Воöма пыр кежлö!

— Челядь, локтö татчö! Галя, тайö менам учитель, код йылысь ме висьтавлі тіянлы,— Дуся топöдіс ас бердас челядьсö. И ме вылö кутісны веськыда видзöдны-дзоргыны куим гоз син.— Со тайö дядяыс велöдліс менö.

— Пельöдыд нечкыліс?— мамысланьö чатöртчöмөн юаліс дзоляник, вежöрттöм на зонка.

— Эг, эг нетшкыв,— öдйö шуи ме.— Нинöмысь вöлі. Тіян мамныд зэв бура велöдчыліс, кывзысьліс.

Ме синъясöс эг вештыв Дусялөн вый пыр кисьтöм кодь челядь вылысь. На вылын вöлі öкуратнöй мича паськөм, коканыс — öткодя вурөм да мичөдөм туфляяс.

— Аддзанныд, ми öні важ серти мөд ногөнджык

олам!—комнатаясод новлөдліг да кытысь мый ньөбө-ма на йылысь висьталіг, ошйысьыштис Дуся. А комнатаясын вөлі унатор: мебельной гарнитур, радио, мича шторьяс, челядьлөн быдсяма ворсанторьяс. Кор нин пуксим пызан сайө, көзяйка шуис:

— А өні висьтала ме тиянлы, мыйла куимнанныслы ньөби лакируйтөм көмсө...

Шуис тайос Дуся да меліа-меліа видзөдліс челядьыс вылө.

— Помнитанныд, коркө урок вылын, тиян юалөм вылө: мый тэ көсьян,—велөдчысьяс пиысь ме өтна-мөн эг вочавидз? Ме сэки эг лысьт висьтавны, мый ме көсьи. Серамыв эськө лэптисны. Йөй нывкаөн ним-тисны.

Өдя ас дорас матыстис медся ичөт писө, пуксьөдіс водзас, шылькнитис пиыс кокеньясын югьялысь көмсө да друг өдйө нуөдіс кинас синьяс кузяыс да шуис:

— Югьялысь-дзирдалысь көм сэки көсьи. Со мый! Та вөсна и татшөмьяссө ньөби аслам челядьлы, медым пөттөдз любуйтчыны наөн, аслам збыльмөм мөвпясөн.

— Сылөн вазисны синьясыс, но кузь син лысьясыс эз лэдзны петны ортсө доршасьөм синвалы.

— Верөсөй менө видө-пинялө. Мый пө таын челядьыс гөгөрвоасны: югьялөны-дзирдалөны налөн көмьясыс али оз—налы дзик веськодь. Медтыкө дзоньөсь вөліны-а. Колө кө аслыд сэтшөмыс—ньөб, а налысө мыйла? Абу, мися, сідз. Ме коркө мучитчи тулыссянь арөдз, потласьөм кокьясөн ветліг. И өні, кор аддза, кутшөм көмөн ветлөны менам челядьөй,—лолөй радлө. Сійө, мый эз вермы лоны мянны вылө челядь дырйи,—өні лои поэяна менам челядьлы.

Ми пукалім, уна сёрнитім, казьтылім. Но кор ме петі вөвлөм велөдчысь ордысь—меным эз вөв кок-

нъыдджык. Меным чайтсис, мый кӧнкӧ сиктын пыр на ветлӧдлӧ гырысь синъяса ичӧтик нывка Пода Ӧдя. Дӧмасӧсь кӧма, вушйӧм платтьӧа. Меным зэв ӧна кӧсйысис паныдасьны ськӧд да козьнавны сылы мичаысь-мича туфли, мичаысь-мича платтьӧ. Кызди Пода Ӧдя, менам вӧвлӧм велӧдчысь да шогалантор, козьналӧма найӧс аслас быдтасьяслы.

## ЛОӦ ВӦРАЛЫСЬ

**Т** улысыд вӧралысь мортыдлысь ӧна шызьӧдӧ сьӧлӧмсӧ. Гезйӧн моз кыскӧны ас дӧнас пармагъяс, ловзьысь вӧр-ваыс. Но кысь на ещӧ мунан, кыкыд кӧ омӧля нин новлӧдлӧ.

Гриша дед частӧкодъ видзӧдлывлӧс кильчӧ вывсьянь лӧзалысь вӧр вылӧ да ышлолалӧс: сэтшӧм окота ветлыны сэтчӧ. А ещӧ окотаджык нуӧдлыны ичӧт внуксӧ, кодӧ тӧвсьяныс нин дзайгӧ-вӧзйысьӧ.

— Дедӧ, ме тшӧтш кӧсья велӧдчыны вӧравны,— бара нин со каньгӧ ичӧт морт.— Ме ог мудз...

— Аски либӧ мӧдӧдчылам,— шуис Гриша дед дзор ус пыткас нюмсӧ дзебигтыр.

И со найӧ, деда-внука, вӧсьлалӧны векныидик ордымӧд. Ягъяс абу на дзыкӧдз кушалӧмаӧсь лымйысь, кок улын дзулькъялӧ ва, логъясын бузгӧны шоръяс. Ӧньӧ кыпыда шавксӧдӧ дедыс бӧрся, кокниа тупыльтчывлӧ туй вомӧн куйлысь колодаяс вывтӧ, вӧсӧдӧньясын чеччалӧ вутшкысь вутшкӧ, оз кӧсйӧ кольччыны. Да и дедыс эз нин вермы тӧрыбасӧ мунны, гӧрбыльтчӧма, киас увйӧсь беддя, сйӧ сьӧкыдакодъ нин лӧптавлӧс кокъяссӧ.

Со найӧ вӧсьлалӧны круткодъ керӧс боктӧ. Вылын,

на весьтын, шувгöны гырысь козьяс да пожöмьяс, а на динöдз тöлыс оз сидз. Öньö сувтовкерлис да чатöртчöмөн видзöдлис крут керöс йывлань, кöни шувгисны пуюсыс, но сук веж увьяса козьясысь кындзи нинöм эз аддзы. А кор крута чатöртчис, сэк юр вывсьыс уси кöч ку шапкаыс да гöгыльтчис увлань. Öньö дыр думайттöг уськöдчис сы бöрся, но мыйöкö крукасис да кымынь шняпкысис-уси.

Гриша дед казялис внукыслысь лым пиö усьöмсö, но нинöм эз шу, сöмын ньöжмöдыштіс воськовсö. А Öньö скөрмыштіс дед вылас: «Мунö, оз и видзöдлы бөрвыв...»—но оз жö шыась. Судзöдіс шапкасö дай öдйö бөр вötöдіс дедсö. А мöдыс нин пуксис мыр вылö, перйис табак кöшельсö.

— Но мый, вöралысь? Гашкö, гортö бөр бергöдчам?— меліа юалис кашкысь-пошиктысь внукыслысь.

— Чайтан, ме мудзи, да?— лечыда шуис Öньö.— Меным ньöти на эз и тöдчыв!

— Мыйкö тай нö водзыд кötасьыштöма? Усьлін али мый?

— Нинöм тайö, дедö. Пытшкöсöдзыс эз йидж.

Дедыслы кажитчисны татшöм кывьясыд, да сійö думыштіс: «Молодеч, оз няргы, ерöмаканьыд. Отсöг эз кор ни». А гораасö шуис:

— Тэ, Öнюк, кор усян, ачыдджык зіль чеччынысувтны. Тэ öд абу нин ичöt... Пармаыд сійö смелджыкьясöс да вынаджыкьясöс радейтö.

Тайöс кывзигөн Öньöлөн пырысь-пыр и разалис дед вылас скөрмылöмыс. Öд дедыс сыкöд ыджыд морт моз сёрнитö. Сьöрсьыс со нуöдіс вөрö и. А ышнясысь Пиля Ваньö, көнкö, гортас дízевидзö-пукалö.

Öньö чышкыштіс кымöссьыс ньылöмсö да юалис:

— Дедö, а мыйла пармаыс оз радейт, кодьяс усялöны?

— Мыйла?— шуис дедыс да мөвпыштчис.— А, буракө, сы вөсна, мый татшөмъясыд оз сяммыны босьтны пармаыслысь озырлунсө. Сюслун колө пармаад. Мед тэнад син и пель быдтор аддзисны да кылісны. А сьөлөмыд нинөмысь эз пов. А абу кө сідзи, нинөмла и шөйтны вөр-ваөдыс, бурджык — град йөрад картупель быдты...

— Дедө,— друг юалис Öньө, өтарө-мөдарө чатрасигтыр.— А өні кө татчө ош петас?

— Оз пет...—серөктіс дед.— Найө, буракө, узьөны на... Да көть и петісны нин, найө миянөс водзджык казялөны.

— Сэсся пышйө али мый ошкыс?—тэрыба юалис Öньө.

— Оз тай көсйы паныдасыны-а. Код төдас сэсся, пышйө али кежө. Бытьтө он кө өбидит сійөс...

— А өбидитан кө?

— Сэки скөр... Сэки Михайлөыд некодысь оз пов... Мый нө чатрасян, Öнюк?.. Оз лок сійө миян дінө — ми жө кыкөнөсь. Да и ми нинөм лөксө эгө вөчөй сылы.— Гриша дед небыда тапкөдыштіс внуксө мышкөдыс, сэсся шуис:

— Но, бара кө мөдөдчылам-а. Вель дыр на өд ковмас миянлы довгыны.

Ыджыд да ичөт вөсьлалөны водзө. Öньө бөрсыйс. Ошъяс йывсьыд сёрнитөм бөрын өні сійө частөкодь бергөдчывлө мышланыыс. Но нинөм оз тыдав... Да и мед волас ошкыс! Со тай дедыслөн патронташыс кос гөгөрыс гартыштчөма — не өти пуля эм сэні. Да и двустволкаыс, шуө, бура инмалө. Лөсьыда сизьдыштам кымөсас.

Дедыс вөсьлалө тэрмасьтөг, морөсас сылөн дугдывтөг мыйкө киргыштө. Отчыд Öньө юалис бабыс-

лысь, мый сәні дедыслөн киргө. Сійö ышловзис да вочавидзис:

— Пöрысьыс, бобöй, киргө. Пöрысьыс нин бось-тöма.

Öньö татшöм воча кывсьыс нинöм эз гөгөрво, но водзö юасьны эз кут.

Талун бабыс Öньöös оз вöлі лэдз вöрас. Сы вöсна весиг пиняліс дедсö. Кытчö пö кагасö нуан сы ылнаас. Вöйтан пö ещö кытчöкө. А дед вочавидзис:

— Öньöйс — кага? Да татшöм молодечсö сикт-сьыд он сэсса аддзы!

А бабыс некыдз оз жö вöлі сетчы. Шуö вöлі, мый ичөтъястö пö вöрсаясыс вермасны кытчöкө нöбавны.

Но Öньö и таысь эз повзыы. Нинöмысь бара сійö оз повзыы, кор öтлаын дедыскөд. Вöрсаясь ни ва-саысь.

— Дедö, кылан, дед!

— Мый нин лои?— бергөдчыштлис мöдыс.

— А кöні нö вöрсаясыс олöны? Налөн тані, пар-маас, керкаяс али мый эмöсь?

— Кутшöм вöрсаяс?— чуймыштлис Гриша дед. Сэс-ся сылы дум вылас усины гөтырыслөн кывъясыс да нюммуни:— Ог төд... Ме нэм чөж вөрті ветла, да не-кор на эг аддзыв. Некутшöм вöрса абу, Öнюк. Эн верит тэ старукаясыдлы. Бабыд повзёдліс тэнö, мед тэ он мун вöрас.

Сэсса найö вель дыр восьлалісны чöла. Рытъя шонді вöлі көнкө зэв ылын да лэччöма нин вөр-тас дінөдзыс. Сылөн югөръясыс эз нин сидзны пашкыр коз увъясö, да лои рöмыдкодъ нин. Вöрыс быттьö шуштöммыштіс. Öньö матөджык сибөдчис дедыс дорö. А кор дедыс друг сувтіс, детинка муртса эз зу-рась сыö.

— Вот и воим, Öнюк!— кыліс сійö дедыслысь кир-

гысь гөлөссө. Водзын сулаліс коз лысьясөн вевттьом чом, код вылө индіс дедыс:—Тані и узьмөдчам. Таянь таръяслөн койтанінөдз, позьө шуны, өти воськов. Со эстөні, важ тыла вылас, найө пируйтлөны.

Дедыс кутіс кывзысьны пельяссө чошкөдөмөн. Орча нюрсянь кылыштіс кутшөмкө аслыспөлөс шы, быттьө кодкө сәні кучкис чер тышкөн тыртөм пельса пьдөсө:

— А-ак!

Өньө повзьөмысла дрөгнитліс да топөдчыштіс дедыс дінө. А дедыс матөдліс крукыля виж чуньсө вом дорас: чөв ов пө.

— Тэ! Тэ! Тэ!— бара кылісны деда-внука. Но сәсся тайө шыяссө вевттисны мөд пөлөсьяс:— Ч-ши! Ч-ши! Чу-вишш!..

Өньөлы дум вылас уси, кытысь да кор кывліс та-тшөм шыяссө. Төчитчигөн, кор лэчтылісны косяяс да черьяс.

— Со, Өнюк, орчөнөсь найө,— гусьөникөн шуис дедыс да индіс кинас нюрлань.

Детинка кутіс тіравны повзьөмысла. Сылы кажитчис, мый тайө вөрсяясыс лэчталөны ассьыныс шыяснысө. Бабыс өд оз прөста вөлі шу...

— Дедө, вай пышьям татысь!..— бөрдөм сорөн шуис Өньө.

Дедыс видзөдліс внукуыс вылө да топөдіс сійөс ас бердас.

— Повзин? Ок тэ, вөралысь... Тайө жө пармаыс сьылө ассьыс тувсовья сьыланкывсө. Тарьяс сьылөны.

— Да-а!.. Сэтшөм гораа? А ме чайті...

— Тайө зэв бур, Өнюк, мый сьылөны... А өні вай биасям. Тэ сямман бипурсө пестыны?

— Кыдз нө ог!— ошйысьөмөн вочавидзис Өньө. Шуас жө дедыс! Кымынысь найө Пиля Ваньөкөд

пестысьлісны Сыктыв дорын либө картупель керигөн муяс вылын. А тані со мыйта кос увъясыс. Детинка дедыс моз жö суйис кепысьяссö вöнь костас да кутіс нетшкыны-кыскавны кос мыръяс, увъяс. Дедыс пуксис чомдорса колода вылö да бара öзтіс каллянсö. Сійö, синъяссö читкыралігтыр, ышöдіс внуксö:

— Вай жö шонты, шонты дедтö!

— Истөгтö вай!— шыödчис Öньö, кор тэчис увъясысь ыджыдкодь чукөр. Сійö уна истөг тув öзтыліс, но увъясыс мыйлакö эз öзйыны.

— Но мый нö, другö? Он вермы?— дэльöдіс дедыс.— Войнас ми тэкöд битөгыд гегдам.

— Сюмөд колö,— шуис Öньö да казътыштіс, кыззи сійö гортас чашйыліс кос сюмөдсö амбар вевтысь.— А тані и кыддзыс абу.

— А тэ вай сюмөдтөгыс öзты,— эз öвсьы дедыс.— Вöралысьыдлы быд ног колö сяммыны öзтыны бипурсö — и зэригөн, и лымъялігөн... Бипуртөг пармаад прöпадитан. Тэ, дерт, пöсьтор сёйыштны көсьян нин?

— Да-а...

— Вот видзöд. А бипуртөгыд нинöм он пу,— велöдіс дедыс.— Би сетö олөм. Тайöс тэ, Öньö, некор эн вунөд.

Пöльыштіс көдзыд лов шыа вой төв. Пöсявлөм бöрад Öньöос йирмөг босьтіс. А би сылөн век на эз öддзы. Сэки дедыс босьтіс сотчөм мыр, чернас поткөдіс сійöс да заводитіс лөсавны чорыд дука сирөд чаг.

— Ноко, тайöс видлы öзтыны.

Мыйөн сөмын Öньö матыстліс биа истөг тувсö чагыяс дінас, найö пырысь-пыр жö чажнитісны-öзйисны. Сэсса Öньö тэчис на вылö первой посни увъяс, сэсса гырысьджыкъясöс, и бипур вочасöң кутіс лов-

зыны пыр ёнджыка и ёнджыка. Сійё регыд сывдіс ас гөгөрсыйс лымсё, шонтіс и Оньоос, сылы регыдөн лои разявны пась кизьяссё.

— Бипурйё ныв пу да коз пу лөдны оз ков,— водзё велөдіс дедыс внуксё.—Навись уна би кинь резсьё, трачкөдчөны найё, а би киньяс вермасны озтыны пасьтё. Вой кежлө бипурйё колө тэчны пожом либё кыз пу.

Пузьөдісны чай, пажыннысё мешөкысь перйисны. Оньө пөляліс чай тыра кружкаас да кывзіс дедыслысь висьталөмсё. Пось чайыс быттьё кутіс визьявны туша кузяыс. Ок и чөскыд вөлөма чайыд вөрын, торйөн нин мудз бөрын! «А лөсьыд жё дедкөд... Збыль, кутшөм лөсьыд! И пармаыс сыкөд озджык повзьөдчы»,— ас кежсьыс мөвпаліс Оньө да нятшкис кос яй.

Шоналөм да пөт кынөма Оньөлөн син лапьясыс эз кутны кывзысьны да асьныс мырдөн пөдласисны, и детинка унмовсис. А дедыс кераліс коз увьяс, наөн кыза вольсаліс чом пытшсё да унмовсьөм внуксё пыртіс сэтчө. Гриша дедлы вөлі сьөлөм вылас лөсьыд, кыпид. Татшөм лунсё сійё важөн нин виччысис. Парма шөрын найё өні кыкөнөсь, эм сылөн төварыш, ёрт. Ичөтик мортөс өнісянь сійё кутас велөдны вөравны.

Гриша дед нопсьыс перйис неыджыд эшкын да юр вывтыыс шебраліс внуксё. Ышловзис: уна на ковмас төждысьны, мед эськө Ондрейсё сувтөдны кок йылө. Регыд сылы школаө мунны. Велөдчытөг өнія кадө мортлы оз позь. Мед велөдчас, прамөй мортө воас. Но внукыс мед эськө оз жө вунөд пармасё. Оз вунөд. Дедыс пуктас став вынсё, велөдас Ондрейөс радейтны парма, сылысь кос ягьяссё, тіль вөрьяссё да нюрьяссё. Пармаыд өд уна, ок уна бурсё сетө мортлы. Кужан кө тэ сылысь бурсё босьтны. А мед кужны,

колö радейтны парматö. Сэки сійö, пармайд, восьтас ассыс став озырлуньяссö.

Гу-гу-гу!—кыліс чом весьтын сюзьлөн буксöмыс. Сылөн, дерт, синьясыс көш пасьятöсь, наысь войся пемыдын некод оз дзевсьы. А сійö, кылö, паськыд бордьяснас öвтіг, лэбзис корсьны аслыс сёян.

Чом весьтын пуксис чöv-лөнь. Ывла вылын эз вöv весиг тöвру, парма унмовсис аслас шы ни тöла крепыд унмөн.

Узь, Öнюкöй, шойччы. Асывводзнас ми тэкöд кутам кыйны крукыля бöжа тарьяссö.

## ВОДЗÖС

**Т**айö посёлोकыс матысса воясö, дерт, лö войвывса нефтяникьяслөн мича карөн. Быдман, паськалан местасö сылы бöрйöмаөсь керöс йылын, зэв кос да кыпыд местаын, көні кымөрөдз кыпöдчöны гум кодь шылыд пожöмьяс. Сöмын пожöмьяс! Ми-ча яг!

Керöс войвывладор горувтыс визувтö ичöтик ю. Но таті сійö шор кодь, код вомөн вуджöны кыз трубаяс. Тайö трубаястыс мунö газ. Ю вомöныс жö вöчöма пода пос.

Кöть и посёлок шöрын кыпöдчöны вит судта гырысь керкаяс, сылөн асывладор помас вель уна на посни пу керка. Налөн, дерт, нэмыс абу нин кузь, но йöзлы мыйкö дыра быть ковмö овны на и сэні. Тайö керкаяссияныс ещö водзö, Тэбуклань, керöсыс зэв крута лэччö увлань, кодлөн подулын, öмидз да сэтөр кустьяс пövстын, куйлöны нитшкөн кыскöм уна ва-лежник.

Шуштём, зыбуча ягсянь өвтö нюр дукөн. Тайö ягыс надёжнöя видзö-дзёбö асьыс олысьяссö. Сэни, кызди шоньд гортын, олöны-вылöны уна съöдбöж, анча, ур, тулан.

Олöны тани и съöляяс да зэв мудер тарьяс. Найö асьнысö видзöны сюся.

Буретш тайö керöсас овмöдчис медся бура дзёб-сясьны сяммысь нейджыд зверь — тулан, кодлөн морöсыс вöли лым еджыд. Кык ли, кум ли гожём чöж олис сийö öтнасөн. Шочиника петавлис вөр дорö, керöс йылö да быдтор кылысь ныриснас кыйис орчча посёлкысь төлөн вайём чöскыдтём дукьяс. А матыстчылис кө морт сыланьö, пуля öдөн лыйыштлис-пышыйлис вөр чащаö.

А со öти гожöмын тулан чужтис нель пи, кодьяс вöлины сöмын кык пев кузьтаöсь. Мам любитис-радейтис найöс, югьявтöдз нюлис быдөнöс торйөн, шонтис аслас телöнас. И кор пияныс быдмыштисны да эз кут тырмыны йöлыс, кутис судзöдны-корсьны налы сёян. Сийö бура төдис тайö крут керöс боксö. Лым еджыд морöса ичотик зверь вöли зэв зиль мамөн, и аслас челядьлы сёян ваялис быд лун пöттöдз сёймөн.

Но кызкö öтчид посёлкса челядь казялисны тулансö, зэв гусьөн лэччисны сы бöрся крут керöс улö, дзёбсисны. Тулан уна кытшов вöчис парма-ягти, чеччалис пуысь пуö, а сэсся воис аслас позйö. Сийö, дерт, эз төд, мый сы бöрся видзöдисны уна сюсь син. Ичöt зверлы эз вöv наöдз. Сийö тиралысь телöнас ляскысис аслас муса пиян дорö да бокысь дзык нинёмтор төдны-аддзыны эз көсийи. Тулан-мам нюлыштит ставныслысь ныр-вомсö. Тайөн быттьö көсийис шуны — ме пö регыд, здук мысти бөр воа — и чеччыштит позсьыс бара корсьны сёян.

Сёян судзöдны-шедöдны кутис лоны лунысь лунö

сьоқыдджык и сьоқыдджык. Позсянь матігөгөрын сійө эз нин вөв. И тулан чеччаліс козсянь козйө, ньыв пусянь ньыв пуө вөрса ты дорө, сэсса кежавліс нюрө, кытшовтіс тысө. Сэні сійө и кватитіс пуртікасысь сьолаөс. Тулан зэв радпырысь бара пуля моз лыйис-локтіс аслас позлань. Пиньяснас топыда топөдөмөн ваийс шевгөдөм бордыяса сера руд сьолаөс.

И мый жө? Кор воис, позйыс вөлі тыртөм, куш...

Виччысьтөмысла тулан уськөдіс вомсысь кыйдөс-сө. Шуркнитліс коз пу йылө, сэсса бөр лэччис улөдз-ыс, бара вывлань кайис, аслас позйө, кодөс лапьяс пиысь боковөй синлы сьоқыд аддзыны.

Пиян эз вөвны. Тулан кө кужис бөрдны либө горыны, вөчис эськө өтисө и мөдсө.

Зверь гөгөр ставсө исаліс да казяліс, мый коз пу гөгөр жөдзөмны йөз, коз пу йылө мырдөн сорөн каттысьлөма морт, коді чашйөма пулысь кырсьсө, чегьялөма увьяссө, ас бөрсяис кольөма ныртө косялана ньылөм дук да кырсь щельясас няйт.

Рытөдзыс тулан стөча туяліс да төдмаліс, кытчө нуөмаөсь сылысь муса челядьсө. Нуөмаөсь посөлокө. А войнас аддзис весиг сійө керкасө, кытчө найөс ва-йөмаөсь.

Югдытөдзыс сійө шөйтис-чеччаліс тайө ичөтик керка гөгөрыс: то орчча томиник пожөм вылө шурк-шарк кайлас, то бөр лэччылас да чеччыштас керка вевт вылас, то кывзысьыштас — оз-ө сетны шы пияныс.

Орчча керка дорын войбыд мый вынсысь сювтчис-увтчис аслас оланінө домалөм пон. Көзяиныс некымынысь петаліс сійөс чиршөдлыны, но мыйөн пырас керкаас,— понйыс заводитліс увтны ещө ёнджыка.

Тулан быд вой кутіс пыськөдчыны-воны тайө кер-

ка дорö, зiлис мыйкö аддзыны, тöдмавны. А домалöм пон важ мозыс увтчис.

Отчыд зверь кавшасис керкадорса пожöм туган йылöдз. Дзедбсис медся сук увъяс пытшкö да кольччис сэнi югдытöдз, а луннас и аддзылис сийö ассьыс пиянсö.

Детинка петкöдiс найöс вугтöм кöрзинкаын керка водзас да кутiс накöд ворсны: то быгыльтас найöс, то гатшöдлас, то рушкаюясас печиктас, то ныръяссö топöдлас. Воисны нöшта детинкаяс, кутiсны вердны зверьпиянöс уль яйөн. Сэссия воис кодлөнкö батыс да, зверьпиян вылö индöмөн, шуис:

— Мыйла мучитанныд зверьпиянсö? Нуöдöй бөр позьяс. Коньöрьяс пропадитасны...

Но öлöдöмыс эз вöv стрöг — челядь эз кывзысьны. И воис сийö луныс, кор туланлы ковмис ас синьяснас аддзыны страшнöй серпас. Тайö лои со кыдзи.

Тулан öтчыд бара дзедбсис пожöм туган йылö да бара виччысис детинкаясöс. Найö петiсны керка водзö да мыйкö йылысь вензисны. На пийсь öти петкöдлiс важ кöрзинкасö, видзöдлiс сэтчö.

— Экма, öти пагалöма.

Детинка босьтiс кулöм зверьписö бөрья кок пöлöдыс да шыбитiс понйыслы. Пöрысь пон, кодöс оз и лэдзлыны дом йылысь, сы вöсна мый усьласьö йöз вылö, — велалöма сёйны кöть мый сетасны, но тайö разын сийö гөгөр исалис кулöм зверьписö, лапанас мöдарö бергöдiс да вешйис сы дорысь...

Аскинас, посёлок помын, кöни сулалисны посни пу керкаяс, лыбис ыджыд шум. Кольöм вой кодкö джэгöдöма уна гортса гулю да курöг. А пöрысь пон усьласьöмысла джagalöма джуджыд забор вылын. Тулан котралöма забор вывтiыс да сэтчöдз скöрмöдöма йöй пöрысь понйöс, мый сийö уськөдчöма сы бөрся,

чеччыштöма забор вомён, öшйöма мöдарладорас дом йылас да и дырён джагалöма.

Дзик вөрбердса керкаясын олысь рабочöйяс, кодьяс видзисны курöгьяс да гортса гулюяс, колисны пöшти кушöсь. И дыр эз вермыны тöдмавны, кодйжö вой шöра войын тадзи пакöститчис посёлок помын. Но коркö-некоркö тöдмалисны «рöзбойниксö». Тöдмалисны и сылысь воывлёмьяслысь помкасö.

— Тайö жö бöжа чöрт! Сйöс асьным ас вылö кыским!—видчисны посёлокса нывбабаяс.

Туланöс кыйöдисны да öти ыджыд пöрысь пожöм йылын ранитисны дрöбйөн. Но сйö эз усь. Зверь кымынкö лун чöж дзедьсясьöмөн олис аслас выль позйын, нюлис ранасö.

Кор тулан ачыс асьсö бурдöдис, сэк выльысь локтис сйö керка дорö, кытчö бытьö сйöс сира гезйөн кодкö кыскис.

Тулан эз на тöд, мый сйö детинкасö, кодй гусялис сылысь пиянсö, буракодь нин ньөрьялисны да тшöктисны бөр нуны позьяс зверьпиянös. Но кывзысьтöм детинка вöчис ас ногыс. Сылы вöли дыш пискöдчыны зыбуча вөрö: и зверьпиянсö шыбитис керös горулö.

Тулан унаысь на кайлис пакöститчыны керös йылö. Но сюри öти пöгребын. Кор кöзьякаыс восьтис пöгреб öдзöссö, пыр и аддзис туланös:

— Со тэ кöни!—шлапнитис бокьясас кияснас нывбаба да уськөдчис кутны туланös. Став банкаяс, тусьяс, дозмукаяс лоины пөрöдöмаöсь-путкылялöмаöсь тулан бöрся вöтлысиг. Но сйö век жö шедис кöзьяка киö.

Туланös йöртисны ящикö, кодлысь дорьяссö сйö йирис да нетшкалис пиньяснас чаг торьяс.

Воис кöзьякалөн верöсыс. Сйö вöли радейтö вö-


равны и, кор готырыс юөртис сы йылысь, мый сійө кутис туланөс, шуис:

— Вєсьшөрө татшөмтор вөчөмыд. Сійө абу мыжа. Тулансө өбидитисны, колисны пиянтөгыс, өтнассө.— И лэдзис зверөс вөля вылө. Лэдзысьыс чайтис, мый сэсся зверь оз лок.

Сөмын эз сідзи ло. Тулан важ сертиыс нөшта ёнджыка на кутис рөзбойничайтны. Сійөс вөля вылө лэдзысьлы быть ковмис кыйны зверөс вөравны петтөдз на. Кыйис тадзи. Туланөс аддзис посёлок помын сулалысь керка вылысь. Повзьөдіс. Тулан шурк-шарк кайис матысса пожөм туганө. Сэки и лыйөма лои. Зверь уси матө пожөм дорө. Но, кор казяліс сы дорө котөртись понйөс, медбөрья вынъяссө чукөртөмөн уськөдчис понлы паныд, сатшкысис пиньяснас сылы голяас, да и кулі...

Пон лөкысь ивзіг-горзіг туплясис пожөм дорын. Туланөс лыйысь өдва сяммис мездыны понсө.

Посёлокын өнөдз эз вунөдны пакөститчысь туланөс. Помнитөны, кыдзи сійө босьтис водзөс аслас пиян вөсна. И гырысьяс век стрөга өлөдөны челядьөс, медым найө эз вөрөдны позьясысь зверьяслысь да лэбачьяслысь пиянсө, эз өбидитны, эз скөрмөдны вєсьшөрө зверь-пөткаөс, кодьяс сідз жө көсийөны овны,— рөдмыны-пасьякавны.



## Очеркъяс

### МИ ВӨЛІМ ЖӨ СЭНІ!

**К**омын во коли сійö историческөй лунсяньыс, кор Сталинград дорын миян сөветскөй войска заводитисны фашистьяслы паньид ыджьид наступление, босьтисны кытшö Волга бердысь налысь став армиясö да чирсисны сійös.

Тані, Сталинград дорын, öтувья тышын победасö шедöдисны став миян сөветскөй народъяс. Сэні вөліны и комияс.

Полковник Николай Васильевич Митюшев сэки

командуйтис Верховной командованиелон 4-од гвардейской миномётной полкса мод дивизионон. А бёрынджык лои полкса командирон. Со мый сийо висьтало тайо съокыд луньяс йывсьыс.

Ноябрь заводитчигон Сталинградсянь неылö ку-тисны чукортны уна артиллерийской да танковöй частьяс, тшöтш и гвардейской миномётъяслысь дивизионьяс. Став сертиыс вöли тöдчö: мян войска лосьодчöны вуджны наступлениеö!

А таодз дыр ми бёрыньтчим, бёрыньтчим съокыд тышьясон. Ни öти километр му эг кольлöй враглы водзсасьтөг. Сталинград дорын фашистьяс воштисны зэв уна йозос да техника. Эз од весьшөрö весиг асьныс гитлеровецьяс Сталинградö туйсö нимтыны «смерть туйон».

...Позиция вылысь менö виччысьтөг корисны гвардейской миномётной частьса командир дорö. Сёрни вöли дженьыд. Сэни жö гижисны приказ: мододны Москваö.

Война кадся Москва вöли стрөг. Тайö шыбитчис синмö быд воськов вылын, столицалон быд пельöсын, быд шыын.

Гвардейской миномётной частьяслон штабын менö пырысь-пыр жö индисны неважон на формируйтöм 301-од гвардейской полкса командирон, кодi сэки сулалис Измайловской парк районын. Полкын вöли куим дивизион, комын квайт «М-13» установка («Катюша») да тысяча сайö гвардеец.

Полклы сетисны боевöй гвардейской Гёрд знамя. Гвардеецьяс сетисны клятва видзны тайö знамясö асьыныс синьяссö моз да кыпöдны сылысь слава враглы паныд тышьясын.

Аслам гвардеецъяскөд, выль техникаон,— ме бара Сталинград дорын.

Ме — гвардейскöй миномётчик да нимкодъпырысь висьтала, мый артиллерийскöй группировкалысь вын-сö ёна зэв содтісны гвардейскöй миномётъяс — «катушаяс». Контрнаступление заводитчигкежлö Сталинградсянь неылö Ставка мөдөдіс Краснöй Армиялөн став полевöй реактивнöй артиллериялысь коймөд юкөнсö.

Но Ставка век жö медся ёна тöждысис танкөвöй да механизируйтөм войска вöсна, кодъяслы ковмис вöчны медся уна вражескöй группировкаос кытшалөм да бырөдөм могысь. Контрнаступление заводитчигкежлö Сталинград дорö вöлі вайöма уна сё танк.

Ноябрь 19-өд лунлы паныда войö воис контрнаступлениеö вуджөм йылысь приказ.

А миян 301-өд гвардейскöй миномётнöй полк водзö командование сувтөдіс кыв кутана мог: «катушаясысь» асьядорыс вöчны прöтивник кузя медводдза залп. И тайос ми вöчим сизим час асылын. Миян 301-өд гвардейскöй миномётнöй полк аслас дружнöй залпөн шызьөдіс асья чөв-лөнсьö да тайөн сетіс общöй артиллерийскöй подготовка заводитөм вылö, став пөлос войскаяслы общöй наступлениеö вуджөм вылö сигнал.

«Катушаяслөн» залп бöрын пырысь-пыр жö заводитісны грымгыны-йиркакывны Сталинградскöй фронтса став пөлос пушкаяс да миномётъяс. Чöла узъысь фронт быттьö ловзис. Враг юр вылö лэбис уна тысяча снаряд. Сöмын миян 301-өд гвардейскöй полк сутки чөжөн немынысь воліс Сталинградскöй фронтлөн уна участокъясö да аслас залпъясөн ранитіс да виис уна тысяча вражескöй салдатос да офицерос. Некемын лун мысти фашистскöй группировка ставнас

веськаліс «налькйö». И сэтысь эз пет ни öти морт. Тадзи Гитлер воштіс ассьыс медся ён армиясö.

Тайö бойясын заслугаясысь 301-öд гвардейскöй полкöс Сöветскöй правительство наградитіс Краснöй Знамя орденön, а менö — Отечественнöй войналön I да II степеня орденьясön.

Доблестнöй сöветскöй войска кужисны дорйыны Волга бердса карöс. И не сöмын кужисны дорйыны, но и враглысь куимсё тысяча сайö морта войска кытшалісны да босьтісны пленö.

Немецко-фашистскöй командование эз виччысь мянсянь татшöм пасьвартöмсö. Сöветскöй войска луннысь-лун пыр ёнджыка и ёнджыка кутісны топöдны да зырны врагöс. Фашистьяс зільлісны на писькöдчыны кытшсьыс, а рытывладорсянь босьтчылісны воны отсöг вылö танкөвöй войска. Но и тайö эз отсав. Лун и вой сöветскöй войска мунісны водзö. Враг эз вермы сувтöдны найöс. Тöдтöм местаяс, омоль туйяс, лым да слöt, муртса кынмыштöм степнöй юяс — ставыс тайö босьтіс помтöм ыджыд вын. Но асланыс индöм туйысь бокö кежтöг Юго-Западнöй да Сталинградскöй фронтьясса танкистьяс, артиллеристьяс да пехота мудзлытöг писькөдісны аслыныс туй. Сьөлөмьясаныс найö нуисны мян армиялысь, став страналысь честь да слава.

Сталинград дорын победа бöрын став мирыс нин аддзис: фашистьясöс лоö жугöдöма. Тайö ёна содтіс мездлун вöсна тышкасысьяслысь выньяссö.

Бöрынджык Сöветскöй правительство шуис пасйыны тайö лунсö — ноябрь 19 лун, кызди Ракетнöй войскалысь да артиллериялысь лун. Ми, тайö тышын участвуйтысьяс, казтылам сэкся сьöкыд луньяссö да шуам: «Ми вöлім жö сэнi, кор Волга бердын сöветскöй войска пасьвартісны врагöс».

## ВӖРСА ГВАРДЕЕЦ

— Уджын вермӧмъяс оз усьны енэжсянь.

Миян закон сэтшӧм: петін удж вылӧ — мырсьы съӧлӧмсяньыд да век велӧдчы налысь, кодъяс мунӧны водзын! — кӧрталіс сёрнинымӧс Иван Турышев, а сэсса, недыр чӧв олыштӧм бӧрын, ещӧ содтіс: — Дзик быд уджын тыдовтчӧ талант, радейтан кӧ сійӧс, сетан кӧ сылы ассьыд олӧмтӧ ставнас, помӧдз. И коді тадзи вӧчӧ, сійӧ ас олӧмас вермӧ да сяммӧ вӧчны унджык да бурджыка.

И дерт, татшӧм тӧлка кывъяскӧд быдӧн сӧгласитчас.

Иван Павлович чужис семьяс квайтӧдӧн, 1931 воӧ. Сыысь ичӧтджыкъясыс ещӧ Алексей вокыс да Эльза чойыс. Но ӧні ставныс нин — кӧкъямыснанныс — кок йылынӧсь, ставныслӧн асланыс семья, посӧлокын быдӧнлӧн ӧкуратнӧй керка. Иван Павлович лӧптӧма керкасӧ том пожӧм да коз пуяс пӧвстӧ, Сыктив ю шуйга береглань лӧччысь керӧс пӧкатӧ. Керкаыс мича сундук кодъ: и ортсысяньыс и пытшкӧссяньыс ӧкуратнӧй. Нӧль морта семья вылӧ вит комната. Майбыр абу дзескыд — и сынӧдыс, и югыдыс, и шоныдыс тырмӧ!

«Чужи-быдми съӧд вӧр шӧрын» — коми поэтлӧн тайӧ кывъясыс мукӧд коми челядьлы серти уна пӧв ӧнджыка лӧсялӧны Павел Семёнович да Матрена Петровна Турышевъяслӧн ныв-пиянлы да на лыдын тшӧтш Иван пиыслы. Турышевъяс пӧшти нелямын во олісны пӧчинокын, Койгорта — Кобраа костын, шӧр выяс кымын. Сэні найӧ юковтісны сук пармаӧс да, уна пӧсь кисьтӧмӧн, нетшыштісны мыръяс бертӧмӧн муяс да видзьяс улӧ куштор... Нелямын во съӧд вӧр шӧрын... Но колхознӧй олӧм, кодӧс найӧ виччысьны эз

кужны, вежис, вужсяньыс выльмөдіс уна Турышевъяс кодълысь олөмсө да оласногсө.

Детинка Иван Турышев помаліс начальной школа, отсасис гортас да колхозын. Дөзьөритіс колхозной вөвъясөс. Томөн заводитіс уджавны вөрын. Вөлі ко-нюхөн, пөрөдчысьөн, сөвтчысьөн. А вояс мунісны водзө.

Воис кад — и допризывник Иван Турышевлы ва-йисны пөвестка. Тайө вөлі 1951 воын. Сійөс колльөдіс-ны Советской Армияө, коді лои пармаса том зонлы ыджыд да пөлезной школаөн. Артиллерист Иван Ту-рышев, коді командованиесянь пөлучайтліс честной да бура служитөмысь благодарность бөрся благодар-ность, эз и казавлы, кыдзи помасис сьлөн служитан срокыс. Иван Турышев бөр локтіс рөдной пармаө.

И со бара чужан местаяс, төдса йөз, чой-вокъяс, мам, бать, нөшта ыдждөм да паськалөм леспромхоз. Мыйө босътчыны? Од некутшөм профессия сьлөн өнөдз абу. Но демобилизуйтчөм салдатөс пыр жө кыскис ас бердас вөр петкөдан көрт туй.

Кондуктор... Но тайө жө нывбабалөн удж. Оз жө кут сійө — тыр вирсөка том морт — пөрысьөдз кон-дукторавны. Паровоз! Со көні местаыс Иван Туры-шевлы. Паровоз вылө! И сөмын сэтчө! Тайө думөн и олис сійө. «Кто ищет, тот всегда найдет!» — сьывсьө ставлы төдса роч сыланкывйын. Аддзис мый корсис и Турышев. Сійөс вуджөдісны машинистлы отсась-ысьөн.

Но мян советской олөмлөн сэтшөм нин закон-ыс — морт не должен жөдзны өти местаын. Сылы колө быдмыны. И дерт жө, тайө закон сертиыс Иван Турышев эз вермы позтысьны нэм кежлө машинистлы отсасьысьөн. Кутшөмкө пытшкөсса вын йөткис сійөс водзө, тшөктіс быдмыны и быдмыны. Сійө аддзис,

сылон матысаяс да тодсаяс олісны буретш тайо закон сертиыс — быдмисны, олөмас вуджисны выльысь выльо, водзю. И сійо наысь эз кольччы: теоретическюя и практическюя велөдіс ассыы паровозсө, а сэсся воон-джынійон мысти успешнөя сдайтис экзамен да лои машинистон.

Иван Турышев дас во сайо нин машинист да старшөй машинист.

Код тодас, тайо каднас кымын рейс лои вөчөма вылыс складсянь улыс складөдз, код тодас, кымын сюрс кубометр вөр кыскис Иван Турышевлон паровозыс вөрысь Сыктыв ю дорө? А кутшөм вежсьөмьяс лоины сылон личнөй да общественнөй олөмын?

Иван Турышев талун ыджыд опыта морт, зэв бура төдө ассыы специальностьсө. Сылон беспокойнөй шудыс оз инась өти местаын.

Но вөрса паровозьяслон, буракө, нэмыс кутис помассыны. Олан луньясыс налон колины лыдаөсь. Найос вежны воисны тепловозьяс, кодьясөс тані виччысисны кыдзи дона гөстьясөс. Паровознөй машинистьяс пиысь кызь морт прөйдитисны водзвыв курсьяс, медым лоны тепловознөй машинистьясөн. Дзик на неважон вөліны экзаменьяс. Көкьямыслы сетисны право сувтны выль тепловозьяслон пульт сайо. На лыдын тшөтш и Иван Турышевлы.

Тепловоз — тайо сложнөй техникалон медбөрья кыв серти вөчөм вөр кыскалысь вына машина. Ветлан туйыс сылон сійо жө узкоколейкаыс, но пөрысь вок сертиыс — паровоз серти — сійо ёна вынаджык, ветлө оз пескөн, а соляркаон. Паровоз вылын кө машинистлысь водзсө жаритө-сотө топка, а мышсө кынтө сквөзь жвучкысь-пөльтысь көдзыд төв,— тепловоз вылын тайо абу. Машинистлон рабочөй места тані пөдса шоныд кабинаын. Дай управлениеыс ёна кокни паро-

воз вылын серти. Но видзодны уна приборъяс выло колё сюсь синъясөн. Машина радейтё, мед эськё ёна радейтисны да бура тодисны сійёс. Сэки сійё мортлы сетас ставсё.

Иван Павловичкөд сёрниын ме казтыштї налөн леспромхозса знатнөй машинист Алексей Васильевич Торопов йылысь. И тайё нимсё кылём бёрын менам сёрнитысь ёртлөн чужомыс пыр жё кыпыда вежсис. Сійё пыдісянь лолыштїс, сьёлёмсяньыс нюмъевтїс да пёся шуис:

— Тайё абу прёстё знатнөй машинист, а ыджыд сьёлёма настоящөй сөветскөй морт. Татшөмъясыс и быдтөны ми вок коддьөмъяссё. Татшөмъясыслысь и колё велөдчыны томъяслы, медым калитчыны уджын. Ме помнита татшөмтор. Делөыс вөлі дасөд формирочнөйын 1956 воө, кор ме уджалі Алексей Васильевичкөд сылы отсасьысьён. Помнита, ми сөвтчим да мөдөдчим улыс складлань, кыдз друг лыбис син ни пель пурга, турөб. Муыс и енэжыс өтлаасисны, мортөс воськов сайысь он аддзы. Пурга омляліс-ыджыдаліс кык сутки чөж. Но ми пыр вөлім паровоз вылын: тшыгөсь, узытөмөсь, но составнымөс эг энөвтөй, паровоз эгө кусөдөй. Пурга ланьтөм бёрын заводитім пискөдчыны увлань. И пискөдчим.

— Но мый, другө! Сьёлөмыд коклябөрөдзыд лэччыліс? А коймөд сутки кө ковмис сулавны, сэки мый?— бөрас шмонитөмөн шыөдчис машинист да ачыс жө лөньөдіс ассъыс бледмөм отсасьысьсө:— Нинөм, Ваньё. Олөмад оз ков лоны көч сьёлөмаөн, а сэсса ставыс век лоө сідзи, кыдзи тэ көсьян.

Тайё да уна мукөд пөлөс төлка велөдөмъясыс, кыдзи арся войын кодзувъяс, югдөдісны менсьым водзө мунан туйёс. Уна, унаторйысь ме шуа ыджыд да

пось аттьо знатной машинист Алексей Васильевич Тороповлы, кодос ми ыстылім КПСС кызыд съезд выло делегатон. И ме чайта, мый ачыс, Алексей Васильевич, доволен аслас питомецьясон, кодьяс восьлалоны сыкод орчон, велодчоны ас уджас пыртны новаторьяслыс не сомын виль технической приёмьяссө, бур уджалан методьяссө, но и велодчоны пось радейтны ассыныс уджсө, велодчоны чожны на кодь жө чувствояс да мовпьяс. Найо лунысь-лун бурджыка гогорвооны уджлысь мичлунсө, трудовай подвижлысь ыджыд тодчанлунсө.

Вылыс складсянь, кытчө петкодоны вöрсө Воктымской массивысь, ньожйө вöрзөдчис тепловоз ТУ-4. Пожом да коз пу хлыстьясон грузитом лякыдик кузь сцепьяс, гораа дзуртомон, дыша мододчисны тепловоз борся. Первойис хлыстьяслон диньяснас пыкис тепловозос, модыс — первойсө, коймодыс — модсө да нельодыс — коймодсө. Нарсадин станцияодз, кытчөдз лэччодас составсө тайо тепловозыс, комын сайо километр. Борө-водзө тайо туйсө суткинас сийо прөйдитө нельысь, а кор и витысь.

Тепловоз вылын Турышевлон смена. Пульт сайын ачыс машинист Иван Турышев. Сийо вөчө медборья рейс, но оз нельодос, а витодос. Вөчө план серти оти рейс содтод, а, сидзкө, и содас кольом толысся серти планлон процентис. Ноябрь толыссын кө сетис сийо план олөмө портом кузя 122 процент, сидзкө, декабрын тайо лыдпасыс лоө нин ыджыдджык.

Нарсадинодз комын километра туйыс вуджө парма да нурьяс вомон пыськодчысь уна посни и гырысь шорьяс, весиг неыджыд юяс. Но найо машинистьяслы служитоны вехаяс пыдди либө километрөвай столбь-

яс пьдди, кодъясӧс временнӧй туйяс пӧлӧн оз сув-  
тӧдны.

— Ыджыд Тыл ю!— шуыштлӧ машинистлы отсась-  
ысьыс. Сідзкӧ, тепловоз прӧйдитіс сӧмын на нель ки-  
лометр. Водзӧ туйыс зумыджык. Машинист содтӧ  
ӧдсӧ.

— Ир ю!— сідзкӧ туйлысь коймӧд юкӧнсӧ на лои  
прӧйдитӧма. Туйбокса шочиник пожӧмъяслӧн пашкыр  
туганъясыс заводитӧны вуджӧртавны ещӧ частӧджык.

— Ибын ю!— та бӧрын колӧ виччысьны улыс  
складӧ — Нарсадинӧ матыстчӧм.

Тепловоз тыр яя, мича, пӧрӧдистӧй вӧв кодъ, код  
вылысь он аддзы дзик нинӧм лишнӧйсӧ. Сы вылын  
ставыс ас местаын. Водзас — двигатель да гидротранс-  
форматоръяс, а бӧрас — аккумуляторнӧй батарея.  
На костын наблюдательнӧй вышка моз муртса вылӧ-  
джык кыпӧдчыштӧ машинистлӧн будка.

Иван Турышев аслас уджалан местаын ставнас  
йтчӧма сылы дӧверитӧм сложнӧй машинакӧд.  
И збыльысь, кымын прибор тани! Кымын стрелка! Быд  
приборын стрелкаяс индӧны то ӧти цифра вылӧ, то  
мӧд, коймӧд вылӧ. И тайӧс ставсӧ колӧ казавны ас  
кадӧ.

Будкаын машинист аслас рабочӧй местаын пукалӧ  
бок ногӧн. Тадзисӧ сійӧ, тушанас бергавтӧг, вермӧ  
видзӧдлыны кадысь кадӧ и водзӧ и бӧрӧ. Синъяс ма-  
шинистлӧн, збыльысь, бӧрас и водзас, а киясыс — то  
газӧвӧй управлениелӧн, то скоростылӧн рычагъяс вы-  
лын, то крепыда кутӧны переводнӧй вал.

Витӧд рейс — сьӧкыд рейс. Тайӧс бура тӧдӧ да му-  
дзӧм вир-яйнас чувствуйтӧ Иван Турышев. Тӧдӧ и  
сійӧс, мый требуйтӧ сысянь машина и мый сійӧ тре-  
буйтӧ сысянь. Но сылӧн мудз душалы век жӧ талун  
долыд. Ставыс гӧгӧр лючки-ладнӧ. Приборъяс петкӧд-

лөны гидротрансформаторын маслөлысь нормальнөй давление, валлысь да двигательяслысь температура кутшөм колө. Тепловоз чушкө-пышкө век водзө и водзө. Но главнөйыс талун — витөд рейс.

Со и Нарсадін. Сэні виччысьö вель смена, виччысьöны свежөй вына йöз. Тормоз — и тепловоз мудзөм, но яр сёлөма вөв моз сувтө да пыкө бөрса буферьяснас тыра сцепьяссö.

— Поздравляйтам, Иван Павлович! Витөд рейс! — встречайтöны будкаысь петысь мудз машинистöс вельясыс. А налы воча Иван Турышев сөмын муртса нюмунö. Сійö велалөма нин татшөм чолөмалөмьясад. Витөд рейс лои помалөма успешнөя — часөнджынйөн чөж некытчö сувтлытөг. А öнi шойччыны, чукөртны вынъяс вель смена кежлө.

Быд мортлөн быдмөм миянлы любө, ми гордитчам сійөн. Но унатор өттшөтш вöчны сьöкыд. Шуам, и велөдчыны, и уджавны, и общественнөй нагрузка нуны, и семьяын мыйсюрö отсыштны öти мортлы, дерт, абу кокни. Сөмын сэтшөмөн нин, буракө, чужлөма Иван Турышев. Душаыс сылөн абу спокойнөй, век кытчөкө пискөдчö, кöсйö вельöс.

— Йöз сертиыс талы унджык öмөй колө? Мый сылы оз тырмы? Со видзөдлөй! — сёлөмсянныс шыасис верöсыс дінö Роза Матвеевна, Иван Турышевлөн гөтырыс. И сэки жö ме водзын, пызан вылас, чужис мича переплөта да бронзөвөй тиснениеа ичөтик книжкаяслөн да гөрд бархатөн кышөм кыз коркаа папкаяслөн дзөнь чукөр. Ме босьтлі киö öтиöс, мөдöс, коймөдöс. Төдмаси накөд — Иван Турышев славнөй трудөвөй делөяслөн вехаяскөд. На лыдын дас сайö почөтнөй грамота Облпрофсоветсянь, «Вычегдалес»

комбинатсянь да асланыс леспромхозсянь, а Миша пиыс удитіс медводз босьтны пызан вылысь мича кык значок, ошодны аслыс моросас да ошйысьны наон, кодъяс вылын гижома: «Отличник соцсоревнования РСФСР». А со ещю оти коричневой дермантинон кышом книжка: «Почётный мастер заготовок леса». Датаыс — 1962 во.

Иван Павлович — книгаяс радейтысь морт. Та йылысь, буракo, тодо сылон начальствоыс да уна полос вещьвой премияяс пиысь отиос сетомаось сылы библиотечка. Тайо библиотечканас козяиныс ошйысис нин ачыс. Сэни и политической, и производственной темаяс выло, и художественной книгаяс. Найос видлаліг-листалігкості Иван Павлович менам киясо суйыштіс кутшомко кыз кодь книга. Тайо воли Вл. Немцовлон «Волнения, радости, надежды» повесть, да сэк жо висьталіс произведениельсь фабуласо:

— Бур, толковой книга. Велодо, кызди воспитаитны коммунистической обществоын олысь мортос, тодмодо чувствояс воспитаитом йылысь сложной вoпросон.

Сэрни муніс и Николай Сизовлон «Сердца беспокойные» книга йылысь, коні авторыс кыпыда петкодло том рабочойяс уджлысь романтикасо. Но Иван Павловичкод беседуйтигон мено шензьодыштіс отитор — сийо сэрниын кутшомакo тодчысь философской тоныс, кыподом темасо обобщайтны кужомыс. И ме юали:

— Иван Павлович, кутшом тиян образованиеыд?

Юали — и ачым гордодышти, сы вoсна мый Иван Павлович ачыс медводз гордодіс. Таысь мыжаыс, дерт, ме: юаломыс лои лoсвятмомнджык.

— Этша мем удайтчис велодчыны. Но тайос они зіля, кызди верма, косодны. Ме жо рытя школаса

«студент», — шпыньмуніс Иван Павлович. — 1965 воын должен помавны квайтөд да сизимөд классьяс.

Миянлысь сёрнинымөс друг ородіс мелодичной музыка. Тайо Иван Павловичлөн ыджыдджык пиыс, Вася, включитіс «Октава» приёмник. Сійос быттьо дзёбёмаось челядьсьыс пушyd мича цвётьяс пытшкө, но наысь өмөй поэю мыйкө дзёбны! Налы мый колө да мый кажитчас — из улысь аддзасны.

— Ті радейтанныд музыка? Кажитчө-ө тайо сыланкывйыс? — приёмниклань юрнас гогнитөмөн юалис Иван Павлович.

— А тайо кутшөм сыланкыв?

— Композитор Аркадий Островскийлөн «Лесорубы». Миян йылысь. Зэв мича песня.

Удж, книгагяс, музыка, челядь, матысса йөз — ставыс тайо йитчөма талунья вөрса рабочөйлөн, вөрлэдзысьлөн өти топыд, цементируйтөм гөрөдө, кодлөн нимыс — олөм!

Роза Матвеевна, коді ачыс уджалө улысса складын бракерөн, примитө сплавлы леспромхозлысь вөрсө, — став сёлөмсянь радейтө ассьыс семьясө: челядьсө и верөссө. Сылы любө верөсылөн бура, честнөя, коммунистическөя уджалөмыс, сійос ошкөмыс, кыпөдөмыс. И сійө сёлөмсянныс көсйө, мед эськөсылөн Ваньяыс удж бөрын бурпөт шойччис. Вөлі гортас син улын. А сійө вөчө, сылы кажитчө, — мөдарө. Пөшти лун кост мысти удж вылысь воөм бөрын вежсяс, сөйыштас да мунө то партбюролөн заседание вылө (сійө жө леспромхозлөн парторганизация бюроса член), то рабочкомлөн заседание вылө: сійө и леспромхозлөн рабочкомса член. Мортлы дөверитісны тайо общественной уджъяссө, сідзкө, дөвериесө колө оправдайтны. Производственной удж, партийной, профсоюзной да мукөд пөлос общественной уджьяс

бара жö йитчöмаöсь öти топыд, разьны позьтöм гöрöдö.

Иван Турышев — талун Койгородскöй леспромхоз-са знатнöй машинист, кодлөн тепловоз вылын дöлалö коммунистическöя уджалысь бригадалөн гöрд флаг. Иван Турышев — вöрса гвардеец, Социалистическöй Удж вывса Герой. Тайö почётнöй нимсö сылы присвоитис СССР-са Верховнöй Сöветлөн Президиум аслас Указөн 1966 вося сентябрь 17 лунö. Сийö олö öти ыджыд кöсийöмөн — сетны унджык вөр страналөн на-роднöй овмöслы. И тайö кöсийöмсö бура пöртö олöмö. Неважөн на, СССР-лөн 50 вося юбилей водзвылын, Иван Турышевлөн бригадалы сетисны, кызди республикаса медся бур бригадалы, — Вөр промышленность кузя министерстволысь переходящöй Гöрд знамя.

## ÖТИ ЗИЛЬ АНЬ

**А**настасия Носкова талун шöр арлыда ныв-баба нин. Чужис-быдмис Визинын, ичöтик Елин сик-тын, кодi райцентрсянь километр кымын катыдын-джык. Дерт, мам-батыс вöлины му вöдитысьяс. Батыс кужлис вурсьыны. Елин сикт шöрö стрöитлис мед-мича квайт пельöса керкасö, тöвьяна да гожьяна джыньясөн. Öни на сийö сулалö, кöть и важмыштöма нин. Наста нылыслы тайö коли бать-мамсö казьтылöм вылö дзик öти наследство сы вöсна, мый квайт чоя-вока пиысь тайö керкаас сийö коли дзик öтнасөн. Найö быдмисны вит чой да öти вок. Витя вокыс вöли курас-карасөн, а чойяс пиысь медичöтыс — Настя. Мукöд чойясыс разалисны öтилаö-мöдлаö, а сийö вужьясис

аслас чужан сиктын да лои нэмөвөйся горт олысьён.

Настя Носкова томысянь лои скётницаён. Сэки Визинса став крестьяна вөліны колхозникьясён. Елинсалён вөлі «Большевик» колхоз. И вот колхоз правление дас өкмыс арөса том нывкалы—Настя Носковалы—дөверитіс видзны-дөзьөритны 15 мөс. Сійө быд боксянь шань, мича тушаа-чужөмбана ныв, таөдз уджавліс разнөй уджъяс вылын колхозын да быдлаын асьсө петкөдліс кокни вөраса, сюсь, зіль да төлка нывкаён. И кор колхозө вайисны выль, бур пөрөдаа скөт—холмогоркаясөс—найөс видзны-дөзьөритны колхоз правление нывбабаяс пиысь индіс том комсомолка Настя Носковаөс. Нылөс көть и выль уджыс повзьөдліскодь, но век жө сійө эз өткажитчы тайө почётнөй уджсыс да, позьө шуны, лои нэм кежлас скётницаён.

Первойя воськовъяс тайө уджын, дерт, эз вөвны кокныдөсь. Од сетісны сылы видзны-дөзьөритны дас вит нетельөс, асланыс колхозысь выль пөрөдаа скөтөс.

— Да, скётницаён уджавны заводитны вөлі сьөкыд,—казьтылө Анастасия Александровна.

— Мыйла?— юалім ми сылысь.

— Кыдзи мыйла?! Меным сетөм холмогоркаясөс, коньөрьясөс, ковмис видзны общөй скөт картаын, көні весиг лясниясыс эз вөвны. Ог нин сёрнитөй водопровод йылысь. Көрымтө вөлі сетан да ставныс уськөдчасны өтчукөрө—мед унджык сюрас,—и джын сетөм турунсө таяласны кок улас, асьныс кольёны тшыгйөн... Сэки силосьяс да өтрубъяс йылысь ми весиг вөтасыны эг кужлөй. И дерт жө, нетельяс кутісны омөльтчыны.

Холмогоркаяслы Настя сеталіс коми нимъяс: «Сьөдпель», «Лөзань», «Понань», «Еджыд юр» да сідз во-

дзё. Нетельяс ставныс вёліны тыраоць,— и кыдзи колхоз правлениеса начальство, сідзи и ачыс Настя Носкова волнуйтчёмён виччысисны вайсян кад. Виччысисны важ пёрёдаа скётос бур, холмогорской пёрёдаён выльмөдөм вылө куканьясөс да бычөпиянөс. Настя дорө тшөкыда воывлісны и ветеринар, и зоотехник, и колхоз правлениеса членьяс.

И со заводитчисны вайсян вежоньяс. Холмогоркаяс өти бөрся мөд чужтісны мичаник куканьясөс. Настя лун и вой пөшти вөлі скөт картаын. Быд здук, быд час, сутки чөж ковмис видзөдны, мед лючки-ладнө кукьясис быд нетель. Но оз тай пыр овлы сідзи, кыдзи көсьян. Көть и коли нин сійө кадсяньыс кызь сайө во, Настя Носкова пыр на помнитө «Лөзаньлысь» сьөкыда вайсьөмсө. Тайө лои вой шөра войын. Настя казяліс тыра «Лөзаньлысь» нөйтчөм-вийсьөмсө. Казяліс да вежөртіс, мый нетелькөд мыйкө неладнө. Сійө котөрөн уськөдчис сиктө, медым кок йылө сувтөдны ветеринарнөй фельдшерөс, а ачыс бөр котөрөн воис скөт картаө. И мый жө аддзис? «Лөзань» кукьясьөма нин, сы дорын ниртчис муртса-муртса на кок йылас сулавны вермысь бычөпи. А мамыс, медым сійөс нювны-весавны да нөньөдны — чеччынысө эз вермы, и зэв шог синьясөн видзөдіс то сы гөгөр гөгралысь көзяйка вылас, то выль чужан аслас бычөпи вылө. «Лөзань» куйліс ньөти вөрзьөдчывтөг. Настя садьтөгыс повзис, да эз төд мый и вөчны... Воисны ветфельдшер да зоотехник.

— Паралич...— дженьыда шуис ветфельдшер, кор гөгөр видлаліс куйлысь мөскөс да пыр жө тшөктіс шөйөвошөм Настяөс да зоотехникөс вөчны куйлысь том мөслы: массаж, а ачыс заводитіс вөчавны укольяс. Куимнанныс мөс дінысь эз вешйивны югдытөдз да вөчисны ськөд то өтитор, то мөдтор. И мый жө? На-

лөн зільом-старайтчөмыс эз весь вош. «Лөзань» кутіс тірзигтырйи надзёникөн вөрөдны кокъяссө, а сэсса заводитіс зільны сувтны. Эз сразу тайё сылы удайтчы, но бара жё сійөс спаситысьяс отсөгөн «Лөзань» лои ас кок йылын, а бычөпи горша заводитіс нёнясьны.

— Сійё воясса скөт видзёмыд, скөтницаяслөн сэкса уджыс да талунья скөт видзём торъялөны ас костаныс кыдзи му да енэж,— казтылө Настя Носкова, коді кызь во чөж дорвыв вөлі скөтницаөн.

И тайё шуөмыскөд некыдз оз позь не сөгласитчыны. Ветымынөд воясө скөт видзёмтө вөлі котыртөма, позьё шуны, дзик на важ моз, пөшти некутшөм механизация скөт картаясын эз вөв нуөдөма. Мөсьясөс сөөдлісны эз торйөн, а өтчукөрын. Юктавны новлөдлісны юкмөс дорө километр джын ылнаө любөй поводдя дырйи— турөб көть веж көдзыд. Йиа ворйө васө лэптавлісны черпушкаөн. Лысьтысисны, вердчисны ки помысь. Гожөмьясын скөтницаяс асьныс жө пастукалісны. Отпускьяс эз вөвны.

— Öні сэкса серти скөтницаяслөн джын удж!— важсө казтыліг шуө Анастасия Носкова. И тайё шуөмыс знатнөй скөтницаалөн бара жө зэв правильнөй. Квайтымынөд вояс заводитчигкежлө нин скөтницаяслысь уджсө лои ёна кокньөдөма, скөт картаясын мөсьясөс и куканьясөс видзан условиеяссө төдчымөнья бурмөдөма. Налөн уджө кутшөмакө лои пыртөма механизация. Скөт картаясө кутіс трубаясөд воны ва: көдзыд и шоныд— кутшөм колө, быд мөслы торья кормушка, скөт картаын югыда өзйө электричество, эмөсь куйөд весалысьяс, гожөмын пастбищын видзөны мөсьясөс и куканьясөс пастукьяс...

— Мөскыдлөн яйыс да йөлыс кыв помас,— шулөмны важ йөз. И тайё дзик збыль. «Гигант» колхозын кө (посни колхозьясөс Визинысь өтувтөм бөрын елинса-

яс лоины «Гигант» колхозынось) местной породаа мосьяс вонас лысьтисны 800—900 килограммон, то «Сысольской» совхозын серпасыс та боксянь вуж выйоныс вежсис.

Со мый висьталё Анастасия Носкова:

— Миян бригадаын, кодён веськөдліс опытной бригадир Василий Васильевич Носков, сетисны нель дояркалы 65 мөс. Вердём вылө оти мөслы рационис: 6 килограмм турун, 12 килограмм силос да 3 килограмм отруб. Лысьтыны норма — 2500 килограммон быд мөслысь. А ми кутім лысьтыны 2600—2700 килограммон мөс вылө. Менам рекордисткаясөн лоины «Лёзань», «Еджыд сюрань» да «Сьод сюраңь». Налысь ме куті лысьтыны куим сюрс килограммөдз.

Со тадзи вежсис серпасыс «Сысольской» совхозса нельөд фермаын. Дояркаяс асланыс зильлунөн, мосьяс вөсна төждысьөмөн кутисны сетны государстволы планысь вывтё ёна унджык йөв.

Дояркаён уджалгөн Анастасия Александровна аслас уджын пыр мыджсьывліс передөвөй опыт вылө. Сійө группаса мосьяслөн продуктивностыс содіс воысь воө. Скөт видзөмын честнөя да бура уджалөмысь КПСС Сысольской райком да райисполком, «Сысольской» совхозлөн дирекция да профсоюзлөн рабочком унаысь наградитлісны Почётной грамотаён.

Беспартийной труженица Анастасия Александровна пользуйтчис фермаын уджалысьяс да сиктса олысьяс пөвстын ыджыд авторитетөн. Сійө вөлі уджалысь йөз депутатяслөн Сысольской районной Советса депутатөн.

А отчыд, рытья идрасьөм бөрын, скөт картаысь гортас мунігөн, бытьё му увсьыс друг паныд петіс налөн бригадырыс — Василий Васильевич.

— Настя! — кыпыда сійө шыөдчис доярка дорө.

— Мый сэтшöмыс?

— Юöрта öтитор, но водзвыв эн повзыы, юöрыс бур. Тэнö «Сысольскöй» совхозысь Визингскöй отделениеса рабочöйяс да служащöйяс, Сысольскöй райкомбинатысь рабочöйяс, инженерно-технической рабoтникъяс да служащöйяс выдвинитисны Коми АССР Верховнöй Сöветса депутатö кандидатөн.

1963 вося март 3-öд лунсянь Анастасия Александровна Носкова вöли 6-öд созыва Коми АССР-са Верховнöй Сöветын депутатөн.

Кык во сайын нельöд фермаысь мöсьяссö вуджöдисны мöд фермаö, Елинсянь ылö, юсайса сиктö. И Настя Носковалы ковмис прöщайтчыны аслас лöзаньяскöд, понаньяскöд, гöрданьяскöд. Сидз жö ковмис вöчны и сылөн верöслы — Роберт Митюшевлы, кодi вöли налөн пастукөн. Гозьяöс мыйкö дыра кежлö шогöдыштлис, но эз дыр кежлö. Найöс виччысис выль удж. Нуöm мöсьяс местаö отделениеса став фермаясысь вайисны куканьясöс. И со Настя Носкова да Роберт Митюшев — кукань видзысьяс. Роберт öдйö «дружитчис» куканьяскöд, мед көть и накöд, кыдзи куим-нель арöса кагаяскöд, ковмылис ноксыны ёнакодь. Торйөн сьöкыд куканьясöс видзны гожöмын, кор Визинса вөр дор видзьяс вылын торья нин лöддзöсь да гутöсь. Жар луньясö найö бöжьяссö лэптасны вывлань, саблясöс моз,— давай ризьявны öтамöд вежмöныс. А лöдзьяс да гутьяс, кодьяслы лыд ни тшöт абу, сöмын и ызйöдöны найöс: дзиз-з, дзиз-з. Медым мынтöдчыны лöдзьясысь да гутьясысь куканьяс уськöдчöны медся сук понöля вөр диясö. Заводитлы найöс чукöртны!

Роберт Митюшев куканьясöс видзис нин кык во,

а ставсö пастукалö дас квайтöд во нин. Тайö каднас скöt дорö сідзи велаліс, мый мöд удж вылö вуджöм йылысь и думъяс абуöсь. Гожöмын сійö видзö норма серти куканьясöс кык мында унджык да пастукъяс костын социалистическöй ордйысьöмөн кольöм во петіс первой местаö, мыйысь «Сысольскöй» совхозлөн партком, рабочком да дирекция наградитісны сійöс Почётнöй грамотаөн.

Тöлын кукань видзысь гозьялы нажötка оз жö кокниа шед. Елинсянь скötнöй дворöдз, коді Цыпанов сикт керöс улын, пöшти километр. И сэтчö колö быд лун ветлыны куимысь. Первой мунöны асывнас вит часын, луннас — дас кыкын да рытнас — витын жö. Скöt карта век сöстөм, шоныд. Сійöс юкöма куим пельö: öти жырыын 4—6 тöлыссяяс; мöдын — арöсöдз да коймöдын — кык да кык сайö арöсöдз. Кор найö лоöны 300 килограмм сьöктаöсь, сэки найöс нуöны нöйтчыны, пөрöны нетельясö, а сэсся и мөсьясö. Тайö кык вонас Митюшев да Носкова нетельясö сдайтісны сё сайö кукань. Сё сайö выль, бур пөрöдаа мөс совхозын кутісны сетны йöв да быд во рöдитны выль кукьясöс!

Анастасия Александровна куканьяс дінö быд кайиг и лэччиг оз вермы волнуйтчытöг видзöдлыны öти выль стрöйба вылö, коді грымвидзö-сулалö Елин сикт катыд помын. Тайö выль скöt карта 200 мөслы олөм вылö. Сійöс стрöитісны бөрья кык воөн. Тані лоö дзик став пөлөс уджсö механизируйтöма: и лысьтысьöм, и юктасьöм-вердчöм, и куйöд весалөм да сідз водзö.

Бригадир Василий Носков, коді öні курсьяс вылын велöдчö, Настя Носковалы Сыктывкарö лэччытöдзыс на шуис:

— Настя, дасьтысь! Вуджан выль картаё. Бөр лоан аслад радейтана мосьяс дорын.

И сэксянь Анастасия Александровналөн съёлөмыс кыпыда да радлөмөн тіпкө быд пөрийө, кор сійө прөйдитө выль скөт карта дорті, коді Елин сиктссянь неуна катыдынджык. Республикаын татшөм механизируйтөм картаыс лоө дасөд, но налөн лыдыс, дерт, кутас содны воысь воө. А, колөкө, пастукөн сэтчө жө вуджас и верөсыс. Уджавны кө нин — өтлаын уджавны! Гозья пыр өтлаынөсь. Öд гозьялөн думьясыс өткодьөсь: и водзө вылө честнөя уджавны совхознөй скөтөс видзөм-дөзьөритөм могысь. Сетны госуларстволы унджык яй да йөв, найөс пөлучитөм вылө этшаджык рөскодьяс вөчөмөн.

А татшөм скөт картаын уджавны, дерт, лоө любөысь любө!

## КОР РАДЕЙТАН ЙӨЗӨС

**В**асилий Николаевичлөн кык профессия: учитель да врач. Но өтиыс мөдсө вежис.

Кызди тайө лои?

Кызьөд вояс. Сыктывкарсянь кызь километр Эжва кывтыдын Слөбөда сикт. Ыджыд семьяын коймөд пинөн быдмис Вася Юркин. Ичөт дырйиыс мөс корсис, Эжва дорын вуграсис, өртьясыскөд ызөдчис-купайчис. Чикышөн лэбыштисны велөдчан вояс: кыпыдөсь, гажаөсь, вунөдлытөмөсь. Вася велөдчис первой тшупөда школаын, семилеткаын, а сэсся и Сыктывкарскөй педтехникумын.

Комынөд вося гожөмын том учитель Василий Юркин воис Летка сиктө. Тані школаыс вөлі крестьянскөй

керкаын, дёскаысь кындзи, позьё шуны, нинём эз вёв. Велёдчан во колё заводитны, став челядьёс, кодлы тырёма школьнõй арлыд, колё кыскыны партаяс сайё. И тайёс том учитель вёчис.

— Ми сэки эг тёдлõй лун ни вой,— казьтылõ Василий Николаевич.— Луннас велёдан, а сэсся ноксян сиктса делёясён. Ёд буретш нуёдсис коллективизация, и учительыдлы неkyдз эз позь лоны таысь бокын. Тõждысьёмыс и майшасьёмыс пёттõдз тырмис сэки.

Сэсся Василий Николаевичёс вуджõдõны Койгортõ, и сйõ котыртõ татчõс леспромхоз бердын учебнõй пункт. Тани Юркин велёдõ 1934 воõдз.

Дерт, учителялõм сылы воõ сьёлõм вылас, но сэки том мортлõн виль вынõн ыпнитõ челядьдырся кõсйõм: лоны врачõн. Уна тõдысь да быдтор кужысь врачõн...

И со нин Сыктывкарсянь Котласõ мунысь пароход вылын, коймõд классын, õтлаын пукалõны коркõя кык однокурсник: Вася Юркин да Толя Нечаев. Васялõн юрувтас — сукар мешõктор, став багажыс. Сйõ мунõ Ленинградõ и весиг нинём на оз тõд, мойвиас-õ сылы. Толя Нечаев, кодi мунõ Москваõ художественнõй академияõ, велёдõ:

— Вася, пыр Герценовскõй институтõ, аслад специальность серти буретш лõõ.

— Ог,— воча шуис Вася Юркин,— менам õни мõд мог эм...

Лун-мõд мысти ыли Коми муысь воõм том морт восьлалис нин академик Павлов нима первой Ленинградскõй медицинскõй институт скверõд. Сьёлõмыс пессис морõсас, быд пõлõс думъяс жуисны юрас: «Примитасны-õ? Верма-õ ме лоны врачõн? Гашкõ, бõр мунны, кытчõдз абу на сёр?»

Но сійö жö лунас Вася сетіс институтö шыödчöм. Сэссия и бура сдайтіс экзаменъяс.

Ленинград, шемöсмöдана мича кар. Квайт во чöж велöдчан вояс. Найö колисны, дерт, эз кокниа. Вöвлöм учительлы лоины дзик виль предметъяс. На лыдын — из кодь чорыд латынь, кодön колö вöлі велавны чачаөн моз вöдитчыны. Но кор морт ёна кöсйö, сійö быдтор вермö вöчны. И 1939 вося тулысын институтысь ыджыд мирас воськовтіс отличие диплома том врач Василий Николаевич Юркин. Профессоръяс шуисны: тэ пö ыджыд сяма морт, тэд пö колö водзö велöдчыны. Колö лоны матынджык институтсянь. И морттö весиг индісны уджавны Ленинградсянь неылö, Свирстройö.

Но ставсö дзугис война...

Василий Николаевич лои аслас чужан карын, сійö кызь во сайö нин уджалö Сыктывкарса республиканскöй психиатрической больничаян. Мыйла сійö сэтчö веськаліс? Öд ставön чайтісны, мый сыысь лоö бур врач-терапевт?

Буракö, сы вöсна, мый юр вежöрсö воштöм морт медъёна дойдаліс сійöс. Дзикöдз воштыны вежöр... Овны съодас... Мый вермас лоны таысь страшнöйджыкыс! И Василий Николаевич шуис лоны психиатрöн. Сэссия и лоис. Уна вояс чöжön сійö бөр бергöдіс сöстöм вежöр код тодас мыйта мортлы нин.

Капитан Сергей Иванович И., коді куйлö торксьöм нервнöй система вöсна, оз аддзы кивъяс, медым атъöавны доктор Юркинöс бурлунсьыс да мортöс гөгөрзоёмсьыс. Тадзи жö и мукöдъяс. Василий Николаевич кужö сибавны быд висъысь дорö и лэдзö ас дорас йöзлы сибöдчыны. Сы вöсна, мый сійö ёна радейтö йöзöс. На вöсна сійö и олö да уджалö.

Ми юалім Василий Николаевичлысь: эмöсь-ö пси-

хическӧй висысыяс пӧвстын сэтшӧмъяс, кодъясӧс оз позь лечитны, либӧ кодъясӧс он вермы лечитны?

Доктор та вылӧ юрсӧ ӧтарӧ-мӧдарӧ бергӧдлӧмӧн вочавидзис:

— Дырӧн, но лечитам. Тшӧкыда паныдасьлӧны сьӧкыда, сідз шусяна шизофренияӧн висысыяс. Но и найӧс лечитам. Ӧні аддзим выль лекарство аминазин — и тайӧ висьӧмыс миянлы абу страшнӧ. Да, быд сьӧкыд висьӧм абу сэтшӧм страшнӧ врачьяслы, кодъяс радейтӧны йӧзӧс!

И Василий Николаевич висьталіс тайӧ диагноза ӧти висысы йылысы, кодӧс вайисны Сыктывкарскӧй психбольничаян стационарнӧя лечитӧм вылӧ дас во сайын.

Нелямын вит арӧса фельдшер вӧлі быд боксянь дзоньвидза мортӧн да уджаліс бура. Отечественнӧй войнаса участник. Бура оліс семьяискӧд. Но кӧнкӧ сійӧс кыйӧдӧма нин висьӧм. Ӧти шудтӧм асылӧ сійӧ кутіс вӧчавны ковтӧмторъяс. И мортыд веськаліс Сыктывкарса психбольничаӧ.

Сьӧкыд вӧлі сійӧс лечитны. Йӧйталӧм вӧснаыс эз кӧсйы юны лекарствояс.

Тайӧ висысысьӧ вӧлі сетӧма Василий Николаевичлы лечитӧм вылӧ. И мый жӧ? Врач дас во чӧж тышкасис, медым висысысьӧс вайӧдны ас вежӧрӧдзыс. И вайӧдіс. Вежӧр мортлӧн шеді. Еджыд халата йӧз венісны страшнӧй висьӧм.

Мӧд висысысьӧс Василий Николаевич лечитіс белӧй горячкаысь. Лечитіс вит во чӧж. И морт лечмис, бурдіс. Ӧні сійӧ уджалӧ заводын, сы дорӧ бӧр локтіс гӧтырыс, сійӧ миритчис пиыскӧд — выльысь бура овмӧдчис сылӧн семьяыс, коді дзикӧдз нин киссьыліс кӧзяинлӧн некытчӧ шогмытӧма олӧм вӧсна... Ӧні ставыс бур.

Василий Николаевичлы, Коми АССР-са заслуженнӧй

врачлы, республикасянь и республика сайсянь вооны уна письмояс. Сійос аттьоалоны торксьылөм бөрын выльысь бур туй вылө сувтөдөм йөз. Унджыкыс на пиысь воштылісны вежөрнысө вина юөм вөсна.

Со мый вөсна доктор Юркин шуө:

— Алкоголизм — ыджыдысь-ыджыд лектор. Дыр юөм бөрын морт воштө өбликсө. Но, пөжалуй, медся страшнойыс сійө, мый алкоголизм кисьтө семья. Арталөма, быд нельөд юксьөм лоө гозья костын кодныслөнкө юөм вөсна.

Кор ми пукалім врачевнөй кабинетын да беседуйтөм Василий Николаевичкөд, сэтчө пырис больничаса главнөй врач Василий Михайлович Рочев, доктор Юркинлөн вөвлөм ученикыс.

— Василий Николаевич,— шуис сійө,— бара ковмас туйө петны. Корөны консультация нуөдны.

— Кытчө? Кор?— сөмын и юалис Василий Николаевич.

— Корөны Ижмаса больничаө. Звөнитліс здравоохранение кузя министрөс вежысь. Корөны сэтчөс врачьяс, көсийоны велөдчыштны тиянлысь.

Татшөм корөмьяс серти Василий Николаевич вөлінин республикаса пөшти быд районын, быд районнөй больничаян, райздравын. Корөм вылө сысянь өтказ эз на вөвлы.

Ми Василий Николаевичкөд ветлөдлім больничадворөд. Нимкодясим томиник пожөмьяса паркөн, асфальтируйтөм туйясөн, лөсьыдіник пызаньясөн да камьяясөн, сөстөм дворөн. Василий Николаевич шуис, мый унджыксө тайөс вөчисны асьныс висьясыяс.

— Сөстөм сынөд вылад буретша уджалөмыд өнажө отсалө висьясысыды, — шуө доктор Юркин. — Удж өнмөдө налысь нервнөй системасө.

— А унаос ті бурдоданныд вонас, Василий Николаевич?— юалі ме.

— Миян психиатрической больнича пыр вонас прөйдитоны вель уна морт: мужичöйяс, нывбабаяс, челядь. Менам киö, кызди лечитысь врач киö, весь-кавлöны тайö йöз пöвстысь коймöд пайыс.

И менö эз шензöд тайö, сы вöсна мый Василий Николаевич ыджыд практикаа специалист, первой степеня врач-психиатр. Кор видзöдан, кызди сийö часъясөн, мудзлытöг, дözмытöг сёрнитö морткöд, медым тöдмавны, мый сийöс мучитö, медым аддзыны, кызди да мыйöн сийöс лечитны,— он вермы не пидди пуктыны тайö мортсö.

Оти асылö врачлөн кабинетö пырис ыджыд тушаа, омöльтчöм чужöма мужичöй да шуис:

— Видза оланныд, доктор... Со и ме вои.

— Вячеслав Васильевич! Тайö тэ?! Гашкö, бара висьмин?

— Эг, Василий Николаевич, дзонь-здоров. Зэв окота лои кежавны тиян динö... Висьтавны та йылысь...— Тадзсö сёрнитигөн мужичöйлөн доршасис синваыс.

Тайö вöлі таво тулыс, кор ывлаыс гөгөр нин вежöдис, кор ставыс ловзис да лöсьöдчис овны тыр вынъясөн. Тыр вынъясөн бара оліс и доктор Юркинөн лечитöм морт.

## ЭМ ВЫЛЬГОРТЫН СЕМЬЯ

**М**еным частö паныдасьлывлöны тайö йöзыс. Найö абу геройяс. Ыджыд подвигыяс эз вöчны. Но асланыс уджөн, йöз динö сибалöмнас найö тшöтш отса-

лөны бурмөдны мянлысь олөмнымөс. И меным око-  
та дженъыдика висьталыштны на йылысь.

Степан Степанович Налимов ветлөдлө протеза,  
шуйга кокыс абу... Воштіс сійөс фашистьясысь Рөди-  
наөс дорйигөн. Чужліс и өні олө карбердса Вильгорт  
сиктын, тасянь жө томиник зонмөн мунліс Отечест-  
венной война вылө.

Кутшөм сьөкыдлунъяс сэки вөліны!..

Йөзлөн вирусь дурмөм враг чашйис мян страна-  
лысь рытиввывнымөс, нетшкысис Москвалань...  
«Ставсө фронтлы! Ставсө победалы!»—тадзи шыөд-  
чис партия сөветской йөз дінө. И быд морт, том и пө-  
рысь, пөся вочавидзисны та вылө.

Степан Налимов кодь дас вит арөса зонкаяслы,  
кодъяс вөліны төрыт на шуда челядьөн, ковмис веж-  
ны батьяссө да ыджыдджык вокъяссө. Ковмис босьт-  
чыны быд пөлөс сьөкыд да кыв кутана уджө.

Мыйсө сөмын эз вөчны сэки татшөм нэриник зонъ-  
ясыс! Гөрисны и көдзисны, турун пуктісны и нянь ид-  
ралісны, пес кералісны и вөр лэдзисны, пурьясисны  
и кылөдчисны. Тэрыб да пельк, ичөтик тушаа Степан  
Налимов век вөлі медколанаинын.

Сьөкыд, вир кисьтана война муніс водзө. Бөрө  
колины Москва вөсна кось, Сталинградской битва,  
Курской дуга вылын чорыд бойяс, Кавказ вөсна  
тыш — и став тайө гырысь бойяса лои дрөбитөма фа-  
шистской зверлысь лы-сьөмсө.

Степан Налимовлы да сылөн тшөтшьяяслы, кодъ-  
яслы война заводитчигөн вөлі дас вит арөс, тырис  
дас көкьямыс. И налы воис война вылө мунан кад.  
И со, Степан Налимов — красноармеец. А тушанас  
мортыд зэв на ичөтик, зонка кодь. Кор новобранецъ-  
ясөс нуисны Архангельскө, воинской частьюн кутісны  
көмөдны-пасьтөдны, Налимовлы эз лөсяв некутшөм

шынель. Весиг медся ичот шынельыслон сосъясыс вö-  
ліны пöшти весът джын мында кузьджыкöсь киясыс  
серти.

— Воюйтигөн нин ме ёнми-зумами,— казътылö  
öні Налимов.— Войнаыд менö содтис и чинтис. Пöшти  
весът судта быдми. Но сы пыдди шуйга кокöй эз ло...

Фронт! Сійö öмöй вунас сылөн, коді сэні вöлі?  
Вунас öмöй, кызди тэнö быд здукö вермö чергöдны  
пуля?.. Степан Налимов аслас частькөд медводз весь-  
каліс Литваö. Карабина том пехотинец сэні и пöлучи-  
тис боевöй крещение. Вöлі не этша чорыд бойын. Öд  
фашистьяс асланыс позлань матыстчигөн пыр скөр-  
джыкөн вöлі лооны.

— Уна коми зонъяс тані воюйтисны,— Степан Сте-  
пановичлөн чужöмыс друг югдö.— Öтчид весиг воча  
воккөд паныдасим, Михаил Оплесниккөд. Öні сійö  
Сыктывкарса сельскохозяйственнöй техникумын уджа-  
лö, учебнöй овмөсөн веськөдлö...

Ме, дерт, юалі, кызди-мый лои тайö паныдасьö-  
мыс.

— Миянлы тшöктисны кутны оборона,— казътылö  
Налимов.— Колö вöлі вежны окопъясысь миянөдз  
тышкасысь боецъясöс... Югдандорыс ми, шынель скат-  
кааöсь, ручнöй пулемөтаöсь, гранатаясаöсь, уськөдчим  
вөр дінысь кушинö да пондім котöрталөмөн, водаліг-  
тыр, пискөдчыны окопъясö. И воим. Ме чеччышти  
первой паныдасысь окопö, сэні куйлысь боец дорö.

— Сет места—ме тэнö вежысь!—негораа шуи.  
Метр джын судта окопын, кызди гортйын, дерт, кы-  
көнлы дзескыд. Сійö пуксис, муртса бергөдчис, а ыв-  
лаыс вöлі рөмдö нин. Видзөдліс ме вылö да друг тай  
кызди горөдіс:

— Стёпа!

— Ме бурджыка видзодлі сы вылө да сідз жө воча горөді:

— Миша!

А некымын лун мысти Степан Налимовлы задъяс швичнитіс разрывнөй пуля. И дзикөдз вундісны том мортлысь коксө...

Сэсся өти госпиталь, мөд, коймөд... Войнабөрся воясө олөм. Сьөкыд олөм... Торйөн нин инвалидлы. Көть и пенсия индіс государство, но тайө өмөй том мортыдлысь бурмөдас сьөлөмсө? Окота вөлі уджавны, өд бур уджысь медьёна нимкодъмө лолыд... А грамота ни специальность эз вөвны.

Отсаліс Сыктывдінса райсобес, ыстіс Налимовөс вурсьысьө велөдчыны. Тайө вөлі 1949 воын. Сійө кадсяныс вөвлөм салдат кызь воысь дырджык нин вурсьө, вөчө йөзлы лөсьыд костюмъяс да дөрөм-гач.

И не сөмын ачыс. Вурсьысьөн жө уджалө и гөтырыс, Мария Андреевна.

Верөсыс кодъ жө киподтуя да шань тайө нывбабаыс, коді быдторсө жө нин аддзыліс олөмсьыс.

Война кадө Маша нима ныв помаліс ФЗО да кутіс уджавны Нювчимса чугун сывдан заводуын, литейщицаөн. Весиг уна мужичөйяс эз вермыны дырсө тані уджавны. А Маша уна во мырсис.

А сэсся өтчыд, Нювчимса пруд дорын, Маша Надуткина паныдасис салдат Степан Налимовкөд. И кажитчисны өта-мөдныслы, кызд шуласны, вирьясныс лөсялісны.

Гөтрасины, овмөдчисны Вильгортын, Степан ордын. Во мысти чужис ныв, Валентина, а куим во мысти пи, Миша, коді лөсьөдчө мунны армияө нин.

Мария Андреевнаны сьөлөм сертиыс жө лои верөсылөн уджыс да тшөтш велөдчис вурсьыны. Сэк-

сянь сэсся өти туйёд и восьлалёны, өта-мөдныслы от-сасигтыр.

Выльгортса бытөвөй обслуживание комбинат өнi зэв унатор вөчө йөзлы, зэв коланаөн лои сiйө. Танi позьө дзоньтавны часiяс, электроприборъяс, бритваяс, пясласян машинаяс, вурсян машинаяс, холодильникъяс, став пөлөс пыж моторъяс, печатайтчан машинкаяс, счётнөй машинаяс да сiдз водзө. Позьө төчитны пуртъяс да пилаяс. Позьө вөчөдны пач духовкаяс, аквариумъяс да весиг самөвар трубаяс.

Танi жө позьө вурөдны костюмъяс, пальтояс да мукөдтор. И найө, кодъяс көсiйөны лөсьөдны выль новлан көлуй, дерт, частө веськавлөны Налимовъяс дiнө. Сы вөсна, мый дыртө уджалiгөн Степан Степанович да Мария Андреевна зэв бур киподтуя мастеръясөн лоины.

Степан Степанович ачыс и велөдiс гөтырсө, вөвлөм чугуи сывдысьөс, вурсьынысө. Велөдiс вочасөн, кыдзи коркө асьсө интернатын велөдлiсны. Ученица гөгөрвоысь вөлөма, кужысь-сяммысь кияса. Регыд мысты кыкөн нин пондiсны ветлыны комбинатө. А сэсся и Валя нылыс тшөтш воис вурсьыны.

Налимовъяслөн семья комбинатын сетө унатор. И не сөмын районса йөзлы, но и республика пасьта. Степан Степанович ёнджыкасө вурө костюмъяс, а Мария Андреевна — уджалан көлуйджык: курткаяс, телогрейкаяс. Валя нылыслы кажитчө вурны моднөй платтьөяс. Найөс, гашкө, медсьөкыд вурнысө, но том швеялөн бура жө артмө...

Лөсьыдiник квайт пельөса керкаын олө тайө семьяыс. Шуда семья. Бура уджалөны, лөсьыда пасьтасьөны, кужөны шойччыны. Керка пытшкөсас став коланторыс эм, телевизор видзөдөны. Быд лун почтальон вайө уна газет да журнал — куимнан республиканскөй

газетсö, районной газет, «Комсомольской правда», «Здоровье», «Крестьянка», «Юность» да «Молодёжная эстрада» журналъяс.

Шойччан луньясö семьянас частö петавлöны шойчыны вөр-ваö. Асланыс «Запорожец» машина эм, ая-пия кыкнанныс кужöны веськöдлыны.

Талунъя советской рабочейö оз вермы сулавны бокын общественной олöмысь. Степан Степановичöс кык пöрийö нин бөрйылисны Вильгортса сиктсöветö депутатöн. Кыдзи депутат, сийö уна вöчис сиктöс мичмöдöм могысь, сельпоясын вузасьöм да детской садьяслысь уджсö бурмöдöм могысь.

Тадзи со уджалöны да олöны менам тöдсаяс, Налимовъяс. Шуи нин тай — подвигыяс найö эз вöчны, но сёлöмсяныыс уджалöмөн тшöтш отсалöны бурмöдны олöмсö.

## ОГЛАВЛЕНИЕ

### Висьтьяс

Тэбук керӧс . . . . .	3
Миянлы колӧ вӧв . . . . .	21
Тулыс вӧсьлаліс водзӧ . . . . .	26
Лӧнь сиктын . . . . .	33
Пода Ӧдя . . . . .	45
Лоӧ вӧралысь . . . . .	50
Водзӧс . . . . .	57

### Очеркьяс

Ми вӧлімӧ жӧ сәні . . . . .	63
Вӧрса гвардеец . . . . .	67
Ӧти зіль ань . . . . .	76
Кор радейтан йӧзӧс . . . . .	83
Эм Вильгортын семья . . . . .	88

**Сергей Михайлович Морозов**

**ВЕСНА ШАГАЛА ДАЛЬШЕ**

*Рассказы и очерки  
на коми языке*

Художник М. Погребинский. Редактор  
П. Шахов. Художественный редактор  
А. Мошев. Технический редактор  
А. Вишнева. Корректор Н. Адамова.

Сдано в набор 13/XI-1972 г. Подписано к печати  
11/I-1973 г. Формат 70×108<sup>1</sup>/<sub>32</sub>. Бум. л. 1,5;  
печ. л. 4,11. (Уч.-изд. л. 3,75). Заказ № 6770.  
Ц00608. Тираж 2000. Бумага № 1. Цена 13 коп.  
Коми книжное издательство. Сыктывкар,  
Дом печати.

г. Сыктывкар, Республиканская типография Уп-  
равления по делам издательств, полиграфии и  
книжной торговли Совета Министров Коми АССР.

---

**ТАЙӦ КНИГАЯСЫС**  
**ПЕТАСНЫ КОМИ КНИЖНӦЙ ИЗДАТЕЛЬСТВОЫН**  
**1973 ВОЫН:**

**Яков Рочев. Паськыд туй вылӧ.** Дневникысь лист бокъяс. Комиӧн.

Коми гижысь Яков Рочев том дырйиыс учителявліс Полярнӧй кытшбердса сиктын. Сэкса олан дырсӧ, Коми мулӧн медылыс пельӧсьясӧ революциялысь сьӧкыд туйсӧ, уна сикас йӧзлысь серсӧ петкӧдлӧма гижысьыс аслас выль книгаын.

**Владимир Безносиков. Свӧякъяс. Се-рамбана повесть да висетьяс.** Комиӧн.

Авторыс — сиктын олысь морт — гижӧ сиктса йӧз йылысь. Аслас выль книгаын В. Безносиков петкӧдлӧ бурсӧ и омӧльсӧ, ошкӧ выльсӧ, кулитӧмӧн петкӧдлӧ важмӧмсӧ, бӧрӧ кольӧмасӧ.

**Юрий Васютов. Пӧртмасьысь Войвыв.** Кывбуръяс, поэма. Комиӧн.

Аслас кывбур чукӧрын поэт петкӧдлӧ парма мулысь, сәні олысь йӧзлысь мичсӧ, налысь кыпыд уджсӧ. Эмӧсь тані и се-рамбана кывбуръяс.

---



13 кӧп.

КОМИ КНИЖНОӢ ИЗДАТЕЛЬСТВО  
1973